


MPULUSU NA NZILA YA NGOLO

 Matondo, mingi. Mbote, bankundi. Ya kele bweso na kuvwanda awa na nkokila yayi, na kuzonza dyaka na beno na Nkumbu ya Mfumu ya beto ya luzolo Yesu Klisto. Mpe ya ke vwandaka ntangu nyonso bweso na kukutana na bantu ya Nzambi, kisika nyonso, mpe kuzonzila na Nkumbu yina ya nene, Yesu.

² Kieleka mu me sepela na nkunga mpangi ya beto vwanda me yimba kaka. Ti, ya kele yina mu ke zolaka mingi. Na kilumbu yina na yina ba ke na kumeka na kusala Yesu kaka profete, to muntu mosi ya mbote, to mulongisi, kieleka yina ke basisa Buzambi ya Yandi, yina Yandi vwandaka. Mpe mu ke kwikila ti Yandi vwandaka . . .

³ Ya me vwandaka ntete ve na Mosi mutindu Yandi, na zulu ya ntoto, ata mbala mosi ve ya ke vwanda. Yandi vwandaka Emmanuel. Yandi vwandaka Alpha, Omega; mbandukulu mpe nsuka; Yandi yina vwandaka, yina kele, mpe ke kwiza; Nsimbulu mpe Mwana ya David; Mbwetete ya Suka. Na kati ya Yandi vwandaka zinga Buzambi. Na kati ya Yandi vwandaka Nzambi.

⁴ “Nzambi vwandaka na kati ya Mwana ya Yandi, na kati ya Klisto, na kuvutulaka ngwisani na kati ya yinza na Yandi mosi.” Yesu tubaka, “Ya kele Munu ve yina ke salaka bisalu, kasi ya kele Tata ya Munu yina ke zingaka na kati ya Munu. Tata ya Munu mpe Munu kele mosi,” Nzambi me monisama, na nsuni. Wapi mutindu ya luzayikisu ya kuyituka ya zola ya Nzambi samu na beto, Yandi zolaka kumonana Yandi mosi mpe kukulumuka mpe kuzinga na kati ya nzutu ya muntu, samu na kukatula disumu mpe kimbevo na bantu, mpe kuvulusa na kuvutulaka beto na Tata. Ya kele mbote mingi, mutindu yina ve? Kieleka beto ke sepela na yawu.

⁵ Ntangu yayi, mazono na nkokila, mu banza ti mu fwana lomba lemvo. Mu . . . Billy bakaka munu, mwa fyoti na nswalu, mazono na nkokila, samu ti ya vwandaka mutindu ya . . . mu kumaka ya kulemba. Kasi balukutakanu yina, kuswasikisa mabanza yina, mpe muntu mosi ve ke zaba yina ya kele, kana ti ya kele kaka . . . Beno fwana kukota na yawu, na kuzaba yawu, beno me mona. Ya kele ve na mutindu ya kumeka na kubangula yawu. Ya kele ve na mutindu yina beno lendaka sala yawu. Ya kele kaka kimbangi yina—yina muntu ve zaba, kaka bayina ke lutilaka na yawu. Yina ya ke salaka na bantu, yina ya ke salaka na muntu, kunata luzingu kaka na ngaanda ya yandi!

⁶ Mbote, beno ke zinga na bayinza zole. Beno kele na yinza *awa*, mpe beno kele na yinza *kuna*, ntangu beno kele na muntu

yankaka, ya lendaka vwanda na bamvula makumi tanu me luta; mpe beno lendaka vwanda na muntu, na bamvula ke na kwiza, bubu yayi; mpe dyaka beno ke zaba ti beno kele ya kutelema na zulu ya estrade awa, mpe beno ke zonzila na kima yina kusalamaka bamvula mingi, mingi me luta; ya lendaka vwanda basabala me luta, bangonda me luta; na yinsi yankaka, na kisika yankaka, to kima mosi. Mpe kuna beno ke meka na kukanga beno mosi ya kusungama, na yawu, mpe kubanza; mu ke tuba na beno, ya kele kaka dyambu. Kasi Mfumu me sakumuna beto tii awa, na kati ya yawu, mpe beto kele na kyese mingi, mpe ke sala kivuvu ntangu yayi ti Nzambi ke kuzwa nkembo na lukutakanu.

⁷ Ntangu yayi, na balukutakanu ya nkokila yayi, mu banzaka, na yina beto kele kaka bantu fyoti, kintwadi; balukutakanu ya beto kele kaka ya kusamuna na kizunga awa, mpe ya kele kaka samu na bantu ya kizunga. Mpe ntete beto kota na kitini ya nene ya balukutakanu, Mu vwandaka banza, bubu yayi, ti mu ke meka na kutala na kunata malongi ya mutindu ya ntama, ya Biblia, na bantu; ti ntangu dyambu ya nene ke kwiza, kana Nzambi kutinda yawu na beto, kuna beto ke vwanda na lenda ya kubakula yawu mbote mingi.

⁸ Na manima ya nyonso, Kubeluka ya Kinzambi kele kaka mpambu na ndobo, samu na kukanga mbisi, mutindu beno zaba. Ya kele kaka yina. . . Mbisi ke simba mpambu mpe ke mina ndobo. Na yawu ya beto ya ngundi. . . Nsuka ya beto kele yayi, ti, kununga myoyo samu na Yesu Klisto.

⁹ Kana Nzambi belusa beno na nkokila yayi, beno lendaka bela dyaka ntete beno kufwa. Beno lendaka vwanda dyaka ya kubela, na mvula mosi kubanda bubu yayi, to bamvula zole kubanda bubu yayi; lendaka vwanda ya kubela na sabala mosi kubanda bubu yayi, to kilumbu mosi kubanda bubu yayi. Mu zaba ve. Kasi ya kele na kima mosi ya kieleka, beno ke bika yinza yayi, mosi ya bilumbu yayi, samu ti yayi kele kaka ya kuyidika.

¹⁰ Kasi kana mbala mosi moyo yina kukota kuvukana na Mpeve-Santu mpe me butuka dyaka, beno me kuzwa Luzingu ya Kukonda nsuka. Ata nyonso yina ke salama awa, ata mbala mosi ve ti beno ke kufwa. Yesu tubaka, “Yandi yina ke kuwa Bandinga ya Munu, ke kwikila na Yandi yina fidisaka Munu, kele,” yina kele ntangu yayi, “Luzingu ya kukonda nsuka, ke kota ve na kitumbu; kasi me,” na ntangu yina me luta, “luta lufwa na Luzingu.” Yina ke sala beto ba-Methodiste nyonso mpe kubanda kuboka, (mutindu yina ve?) ya kele kieleka, na kubanza yawu, ti Nzambi salaka yawu. Ntangu yayi, yina kele ve ndinga ya munu; ya kele ya Yandi, Santu Jean 5:24.

¹¹ Santu Jean 6, Yesu tubaka, “Yandi yina ke kudya nsuni ya Munu, mpe ke kunwa Menga ya Munu, kele na Luzingu ya kukonda nsuka; mpe Mu ke vumbula yandi na kilumbu ya nsuka.” Ya kele kieleka. “Yandi yina ke kudya nsuni ya Munu,

mpe ke kunwa menga ya Munu, kele,” yina kele na ntangu yayi, “na Luzingu ya kukonda nsuka.” Ntangu yayi, “kukonda nsuka” yayi, ya ke banda kaka ve reveil mosi na mosi yankaka, kasi ke kwenda Seko nyonso.

¹² Mpe ntangu yayi, samu na bayankaka ya beno milongi yina kele ya kuvwanda pene-pene, na kuzabaka ti “Luzingu” yina ya kukonda nsuka me katuka na mpova mosi yina zola kutuba “Luzingu ya Nzambi.” Mpova Zoe, mpova ya Grec, yina zola kutuba “Luzingu ya Yandi mosi Nzambi.”

¹³ Kuna, beto me kuma mwana-bakala to mwana-kento ya Nzambi, mwana ya Nzambi, na ndambu ya Luzingu ya Nzambi na kati ya beto. Beto lenda kufwa dyaka ve mutindu Nzambi lenda kufwa ve, kana ya meka. Na yawu, beto kele na Luzingu ya kukonda nsuka; mpe ba ke vumbula beto na kilumbu ya nsuka. Ya kele mbote? Yina ke sala ba-Baptiste, ba-Methodiste, kubula maboko mpe kuboka. Mutindu yina ve? Kieleka ya ke sala. Ya kele kieleka.

¹⁴ Ya kele kima ya mbote na yina me tala nsambulu ya ntangu ya ntama. Ya ke salaka kaka muntu nyonso kuvwanda kintwadi mpe kuzola mosi na yankaka. Kieleka ya ke salaka. Ke katula baluswaswanu nyonso, ke sala bivangu ya malu-malu. Ya ke sala kazaka ya smoking, mpe salopette, kubumbasana na maboko ya bawu na zulu ya mosi na yankaka mpe kutuba, “Mpangi, wapifaso?” Ya kele kieleka. Kieleka ya ke sala. Ya ke sala robe ya swa, mpe ya amelikani, kubumbasana na maboko ya bawu mpe kutuba, “Mpangi-kento, mu zola nge.” Yawu yina ya ke salaka. Ya kieleka ya ke salaka, ke mwangisa kaka luswaswanu. “Mvwama to mputu, mpika to kimpwanza, beto nyonso kele muntu mosi na kati ya Klisto Yesu.”

¹⁵ Lumingu, na tabernacle, na yina mu ke mona ya kele na nkonga ya muvimba ya bantu ya tabernacle ya kuvwanda awa, beto vwandaka-beto vwandaka me kuzwa—me kuzwa lesu mosi—mosi ya lukolo ya Lumingu, na zulu ya “mpulusu na nzila ya menga.” Mpe mu me kotwama mingi na yawu, tii mu ke kuwa mutindu mu kele dyaka na kitezo yankaka kisika mosi, na zulu ya: *Mpulusu Na Nzila Ya Menga*.

¹⁶ Mpe na nkokila yayi, na manima dibuta me kwenda mpe vwanda me kwiza awa na ntangu ya mbote, samu na kwiza kuwa bankunga, mpe nyonso yina, mu vwandaka na kati ya kivinga. Mpe ya monanaka mutindu. . . Mu bandaka na kutanga na Masonuku, mpe mu monaka kima mosi. Mu banzaka, “Mbote, kana Mfumu zola, mu ke zonzila kaka na zulu ya yawu mwa ntangu fyoti na nkokila yayi.”

¹⁷ Ya kele, *Mpulusu Na nzila ya Menga*, na Lumingu. Ntangu yayi, na nkokila yayi, mu ke zonzila na zulu ya *Mpulusu Na Nzila ya Ngolo*. Mpe mbasi na nkokila mu ke zonzila na zulu ya

Mpulusu Na Muvimba Ya Yawu, (kana Nzambi zola, ya kele), *Na Kyese*. Mpulusu na menga; na ngolo, mpe na kyese!

¹⁸ Mpe samu na kubasisa yayi . . . Ntangu yayi, bantu mingi, ya mbote, bizabi longokaka zaba mutindu ya kunata mpe kupesa mutindu yayi ya luzayikisu, ya lendaka vwanda, samu na *yayi*, to *yina*, to kulosa ndambu. Kasi, munu, mu kele mutindu mosi ya bifwanukusu ya milongi yayi yina longokaka ve yina kele. . . . Kima kaka yina mu zaba na kusala, samu na kundima ti mu kele kieleka pene-pene ya kieleka, na mutindu nyonso, ya kele kukwenda na bivudi. Kana mu banda na kutambula na lweka ya kibaka, mpe nsemu na lweka *yayi*, mu lendaka tuba yina kaka, na kutala mutindu mu kele; kana ti mu kele kibulu ya makulu yiya, to—to ndeke, to yina ya kele, kana mu mona mutindu ya kivudi mu ke lakisa.

¹⁹ Ntangu yayi, Ngwisani ya Ntama vwandaka kivudi ya Ngwisani ya Malu-malu. Ya vwandaka negatif. Mutindu ngonda, na mwini; mwini ke lezimaka na ngonda, ke lakisa nsemu na zulu ya ntoto. Mpe mu ke zolaka kaka Ngwisani ya Ntama! Ya kele kaka ya kifuluka na bingana mutindu yina, to, mutindu ya lendaka vwanda. Ntangu yayi, ya kulunga . . .

²⁰ Na Genèse, ntangu Nzambi salaka mwini, ntete, na manima ngonda, ngonda yina mpe mwini ke monikisa Klisto mpe Dibundu. Kaka mutindu mwini ke kotaka na ngolo mpe nkembo ya yawu; mpe ntangu yawu ke kulumuka, yawu ke lakisa nsemu ya yawu na ngonda, na mpimpa, samu na kupesa nsemu na zulu ya ntoto na yina mwini me kwenda. Yesu, ntangu Yandi kwendaka, Yandi kotaka na Nkembo mpe lakisaka Nsemu ya Yandi na manima na zulu ya Dibundu; samu na kupesa, Dibundu, Nsemu ya Nsangu ya mbote tii ntangu Yandi ke vutuka, oh, la la, mpe kuna bawu ke kwelana. Ya ke vwanda mbote mingi. Ya ke vwanda Nsemu mosi ya nene ya ngonda mpe. . . . “Mwana-dimeme kele nsemu ya yawu.” Ba vwandaka dyaka na nsatu ya mwini ve, na Mbanza.

²¹ Ntangu yayi ntete na kukota, beto vutuka na Exode. Mpe mu banza ti beno me lembe munu ve na kuzonzilaka na Exode.

²² Kilumbu mosi, na dibundu ya munu kuna na simu ya nzadi, mu longaka, mu banza, pene ya mvula mosi na bangonda sambanu, na zulu ya Job, konso nkokila. Ba ke vutuka; mu ke baka kaka kitini mosi ya fyoti ya Job, mpe, kulandila, beto ke sala yawu kutambula na nzila ya Biblia.

²³ Konso Disonuku ke vukana kintwadi. Ya kele ve na luswaswanu na Ndinga ya Nzambi. Ve, tata. Konso kitini, ya kulunga! Buku kaka yina me sonamaka kaka yina kele ya kutwadisa na kimpeve mutindu yina, yina lenda na mutindu ya kulunga. . . . Ya kusonika na nzila ya misoniki mingi, mpe bankama mingi ya bamvula ya kukabuka; mpe mosi na mosi ya bawu, na nzila ya Mpeve-Santu zonzaka, kaka ya kuvukana

kintwadi. Ya kele samu na yina, na zulu ya babuku nyonso yayi yankaka, ba-Maccabée mpe nyonso, ya ke vukana ve na Yayi, na yawu mu ke ndimaka yawu ve. *Yayi kele* Ndinga ya Nzambi, samu na munu.

²⁴ Mpe kento mosi sonikaka munu mukanda mpe yandi tubaka. . . Mu vwandaka longa; Job na zulu ya kikunku ya bombi. Yandi tubaka, “Mpangi Branham, nge me vwanda, nge banza ve ti, nge me baka Job na zulu ya kikunku ya bombi ya me kuma bilumbu? Ya me kuma na kutala basabala sambanu.” Yandi tubaka, “Kasi, nge ke katula yandi ve na kikunku ya bombi?”

²⁵ Mbote, mu tubaka, “Ntangu Mpeve-Santu ke bika na kupusa Bandinga kuna, Mu banza ti mu ke vwanda kaka ya kukwika na kubika kutuba yawu.” Kasi ntangu nyonso yina Yandi bikaka munu kuzonza na zulu ya yandi na zulu ya kikunku ya bombi, mbote, mu vwandaka kaka na yawu; mpe myoyo vwandaka vuuka.

²⁶ Na yawu, mutindu evangeliste, kwizaka na mbanza. Yandi longaka, mpimpa mosi, yandi longaka na zulu ya kubalula ntima. Nkokila yina landaka, yandi longaka na zulu ya kubalula ntima. Na nkokila yina landaka, yandi longaka na zulu ya kubalula ntima. Na manima ya pene bankokila yiya to tanu, kimvuka ya badiakre kutanaka na yandi mpe tubaka, “Mpangi, nge lenda longa kima yankaka ve kukondwa kubalula ntima?”

²⁷ Yandi tubaka, “Oh, yinga. Ti bawu nyonso, kubalula ntete ntima, kuna mu ke longa na zulu ya kima yankaka.” Na yawu yina kele dibanza ya mbote. Bawu, nyonso, kubalula ntima, na manima beto lenda longa kima yankaka. Mbote mingi.

²⁸ Samu na kukota ya ntete ya fyoti ntangu yayi, samu na bayina, to mingi-mingi samu na bayina vwandaka ve na Tabernacle Lumingu na suka. Beto zola kuvutuka na kapu 12. Kasi dibanza ya beto na nkokila yayi kele na kapu 14, kubanda na nzila 13 ya Exode. Ntangu yayi, beto sukaka na nzila ya 10, na Lumingu na suka, na “*mpulusu na nzila ya menga.*” Na kutala beno nyonso zaba disolo yango, mu ke ndima.

²⁹ Ntangu yayi beto zaba ti beto lendaka vutula bapaze ya Buku yayi, mpe kubalula bapaze yayi. Kasi ya kele kaka na Mosi Yina lenda zibula Buku, ya kele Yesu Klisto.

³⁰ Jean kumonaka Buku. Ya vwandaka ya kutula kidimbu. “Mpe yandi dilaka samu ti ya vwandaka ve na muntu na Mazulu yina lendaka kuzibula Yawu, muntu ve na zulu ya ntoto, muntu ve na yisi ya ntoto. Kasi ya vwandaka na Mwana-dimeme yina kufwaka katuka mbandukulu ya yinza, kwizaka kubaka Buku na diboko ya kibakala ya Yandi yina vwandaka na zulu ya Kiti ya kimfumu, mpe zibulaka bidimbu mpe—mpe zibulaka Buku, bukaka bidimbu na yawu. Mpe Yandi vwandaka ya kulunga, samu ti Yandi kufwaka katuka mbandukulu ya yinza.”

³¹ Beto zonza na Yandi, na nkokila yayi, mpe beto lomba Yandi na kuzibula Yawu samu na beto kaka ntangu yayi.

³² Ntangu yayi, Tata ya luzolo, ya mbote, beto me kwiza na Nge, na kuzonzaka na Nge, ntete, na Nkumbu ya Yesu. Na kusambilaka ntangu yayi, ti, mutindu beto kele awa, ya kubumbama na yisi ya muludi yayi, na nkokila yayi, kisika kitembo yina ke na kubula na ngaanda, mvula ke na kubwa ke balula bima mpe mupepe ke fula, beto ke vutula matondo mingi na kuzwa yinzo ya Nzambi kisika beto lenda kota. Mpe beto ke vutula matondo ti ya kele na yinzo ya yinda, kiswamunu; Nge tubaka, “Nkumbu ya Mfumu kele yinzo ya yinda ya ngolo; muntu ya mbote ke kima na kati mpe kele na lukengolo.” Beto kele na kyese ti beto zaba Nkumbu ya Mfumu, mpe me kota na Yawu.

³³ Ntangu yayi beto ke sambila ti Nge ke zibula Ndinga yayi na beto, na nkokila yayi, Tata. Ti Mpeve-Santu kukwiza mpe kukota na Ndinga. Vedisu bikoba ya kisadi ya kulemvuka ya mputu yayi, mpe bantima ya bayina ke kuwa, bana ya Nge. Mpe ti Mpeve-Santu kubaka kaka Bandinga ya Nzambi mpe kutula Yawu na kati ya konso ntima, kaka kisika nsatu ya Yawu kele. Sakumuna beto ntangu yayi. Vutula ya malu-malu mabanza ya beto, na nkokila yayi, na Mpeve ya Nge. Kuzwa nkembo na lukutakanu. Vulusa bayina me zimbana. Belusa bambevo. Nata na Yinzo bayina me vutuka manima, Mfumu. Mpe beto ke pesa Nge lukumu, samu beto me lomba yawu na Nkumbu ya Nge, ya Mwana ya Nge ya luzolo, Yesu. Amen.

³⁴ Ntangu yayi beno baka nzila ya 10 ya kapu 12 ya Exode. Beto vwandaka tanga, *“mpulusu na nzila ya menga,”* mutindu ti Nzambi tumaka ba kufwa na kati ya konso yinzo mwana-dimeme, mutindu ya zolaka vwanda na kima ve yina zolaka bikana.

³⁵ Balufundusu vwanda kubwa, mpe lufundusu ya nsuka vwandaka ya kukubama na kubwa. Nzambi zolaka lungisa Ndinga ya Yandi, landila mukanda. Mpe balufundusu nyonso yina kuna vwandaka kidimbu ya kulunga, to kifwanukusu ya kulunga, ya balufundusu yina me kubama na kubwa ntangu yayi.

³⁶ Mpe kana beno tala, ntete lufundusu kubwa. Ntangu yayi milongi lendaka wisana ve na munu na yayi, ya kele ya kulunga. Kasi ntete lufundusu kubanda na kubula Egipte, Nzambi fidisaka Israël na Goshen. Ba vwandaka na Goshen, mpe ata mpasi mosi ve kubwaka na zulu ya bawu. Kifwanukusu ya kulunga ya Dibuundu yina ba me nata na zulu, na nzila ya lukwamusu, beno me mona. Mbote mingi.

³⁷ Kuna na mpasi ya nsuka yina bulaka ntoto kuna, to yina bulaka Egipte, vwandaka lufwa. Beno nyonso bitangi Biblia awa, beno zaba baleso ya beno ya lukolo ya Lumingu mpe nyonso

yina, me bakaka yayi, mu banza, bambala mingi. Kasi, lufwa vwandaka mbeni ya nsuka yina bulaka Egypte.

³⁸ Mpe mbeni ya nsuka yina ke bula dibuundu ntangu yayi kele lufwa, na nzonzolo ya kimpeve. Bayina ke landa ve Klisto, na—na mbotika ya Mpeve-Santu, landila kimpeve ke yuma mpe ke kufwa; mabuundu, beno lenda mona yawu ntangu yayi. Na manima ya ba-reveil mingi, ya nene mpe ba-evangeliste me luta na yinsi, mpe, dyaka, dibuundu kele, yina kele, dibuundu ya bantu ya politiki, ke na kulutula kaka na kukuma yimbi ntangu nyonso. Bamambele ya yandi ke na kuzingaka kaka mutindu bawu zola, na kusalaka nyonso yina bawu zola, dyaka, ke bokila bawu mosi Baklisto, mpe ke tuba ti bawu kele ya kulunga.

³⁹ Kuvwanda *Muklisto*, zola kutuba kuvwanda “mutindu Klisto.” Kukwenda kisika ve beno ke zola ve kuvwanda kana Klisto zolaka kwiza. Kutuba ve kima beno ke zola ve kuvwanda na kutuba ntangu Klisto ke kwiza. Kusala kima ve yina beno ke zola ve kuvwanda na kusalaka ntangu Klisto ke kwiza. Beno banza ve na kima beno zolaka kuvwanda ve na kubanza ntangu Klisto ke kwiza. Beno bumba motifi mosi ya beno, ntima ya beno ya kukangama na Calvaire. Amen. “Beno tambula na kati ya Nsemo, na yina Yandi kele na kati ya Nsemo, mpe beto kuzwa kubundana mosi na yankaka, mpe Menga ya Yesu Klisto, Mwana ya Nzambi, ke sukula beto na masumu nyonso.” Ya kele ba-Méthodiste, ba-Baptiste, mpe beto nyonso, kintwadi, ke salaka beto nyonso mosi na kati ya Yandi.

⁴⁰ Ntangu yayi, ya nsuka, kima ya nsuka vwandaka lufwa. Mpe ntete ti lufwa yina kukwiza, ya vwandaka na kukatula-masumu yina ba salaka samu na lufwa yina, samu na bayina nyonso zolaka kukima yawu.

⁴¹ Mpe ya vwandaka na kukatula-masumu yina ba salaka na ntwala ya kubeba ya ntete, ya yinza na maza. Nzambi vwandaka na mulongi ya ludedomo, Noé, mpe yandi longaka bamvula nkama mpe makumi zole, samu bantu kota na nzasa. Mpe bayina mangaka na luzolo ya bawu na kukwiza, ya vwandaka ve na kima yina bikanaka kasi lufundusu.

⁴² Mpe, bubu yayi, muntu yina ke manga na kutambula na Nsemo ya Klisto, beno me manga kyadi, na yawu ya kele na kima ve me bikana kasi lufundusu. Kaka yina. Ya kele kaka na lweka ya kibakala mpe ya kikento, yina kaka beno lenda kwenda. Mpe beno sala nsodolo ya beno.

⁴³ Ntangu yayi, beto ke mona, ntete mpimpa ya nene ya boma kukwiza, ti Israel kuzwaka lutumu. Mpe beto bakaka yawu yimeni, na kufwaka mwana-dimeme.

⁴⁴ Nzambi vwandaka nata dibuundu ya Yandi na exode, samu na kubasisa yawu na Egypte, na yinsi ya nsilulu. Mu ke zolaka yawu. Ba vwandaka kwenda kuna, samu na kubaka yinsi. Nzambi pesaka bawu yinsi, mpe kasi ya vwandaka nyonso ya

kuzungudila na malami ya nene, bayinzo ya yinda ya nene mpe bibaka. Mpe bibaka na ziunga ya Jéricho, bipusu zolaka sala nsaka ya kukwenda mbangu na ziunga ya yawu. Mpe beno banza kaka na yawu, ata ti, Nzambi tubaka, “Mu me pesa yawu na beno. Ya kele ya beno.” Kasi bawu zolaka sukula yawu, kusukula yawu.

⁴⁵ Mpe ya kele yina Nzambi me sala bubu yayi. Yandi me pesa mosi na mosi ya beno, yina zola Yawu, mbotika ya Mpeve-Santu. Kasi beno fwana kota, kubaka Yawu, kaka yina; kunwana baluswaswanu, mpe kumwangisa bibaka, mpe kukota kuna mpe kuzwa Yawu.

⁴⁶ Beno ke tuba, “Pasteur tubaka, ‘Ya kele ve samu na beto bubu yayi.’” Beno landila kaka na kutambula mpe beno luta yawu. “Mama tubaka, ‘Mu ke basisa nge na yinzo.’” Beno landila kaka na kukwenda mpe beno luta yawu. “Bakala tubaka, ‘Mu ke manga nge.’” Beno landila kaka na kuwenda mpe beno luta yawu. Kaka yina. Beno fwana kwenda mpe kubaka Yawu! Kaka yina.

⁴⁷ Kubeluka ya Kinzambi kele samu na mosi na mosi ya beno. Mosi na mosi ya beno ya kuvwanda awa na nkokila yayi, na cancer, mpasi ya ntima, nyonso yina ya kele, Nzambi me pesa nsilulu. Mpe ya kele ya beno, kasi beno fwana kwenda mpe kubaka yawu.

⁴⁸ Ntangu yayi beno ke tuba, “Mbote, mu ke na kuwa kaka mbote mingi ve.” Yina ke na kima mosi ya kusala na yawu ve. Nsilulu kele ya beno. Nzambi pesaka yawu na beno. Beno kwenda kaka na kati mpe beno kufwa ba-Philistin, na lweka mosi na yankaka. Mpe kubasisa ba-Hevien nyonso na—na ba-Amoréen, kufwa kaka bawu nyonso. Beno kota, beno baka yawu. Nzambi tubaka, “Ya kele ya beno. Beno kwenda kuzwa yawu.”

⁴⁹ Kasi Yandi tubaka ve, “Ntangu yayi, Mu ke kota, Mu ke komba yawu nyonso, mpe ke tungila beno bambanza mosi ya mbote, mpe ke vwandisa beno na bala-bala ya kukondwa mpasi.” Yandi ke salaka ve mutindu yina.

⁵⁰ Yandi ke pesa yawu na beno, mpe beno kele na kima ya kusala. Yandi kele mbote mingi samu na kupesa beno yinsi, tubaka ti Yandi ke sadisa beno mpe ke vwanda na beno. Beno kwenda, baka yawu!

⁵¹ Mpe kana beno kele mbevo, na nkokila yayi, kikata, mpofu, kifwa-makutu, baba, nyonso yina beno kele; beno kwenda, baka yawu. Nzambi tubaka ti ya vwandaka ya beno. Ya kele kima ya beno. Nzambi pesaka yawu na beno.

⁵² Yandi tubaka na bawu ti Yandi ke pesa bawu yinsi yina. Yandi fidisaka Wanzio na ntwa ya bawu, samu na kukeba na nzila, na kukotisa bawu na kisika yina ya vwandaka.

53 Beno tala balangididi yina ntangu bawu kwendaka kuna. Awa me kwiza kumi ya bawu na manima, me tuba, “Oh, beto lenda ve kusala yawu. Ya lenda salama ve. Beto tala, beto kele bantu ya science, mpe beto me fyongonina kima. Landila science ya lenda salama ve. Beto lenda sala yawu ve.”

54 Kasi ya vwandaka na bantu zole, mosi ya bawu vwandaka na nkumbu ya Josué, mpe mosi na nkumbu ya Caleb. Ba vwandaka tala ve na lweka yina vwandaka science. Ba vwandaka tala na yina Nzambi tubaka. Bawu tubaka, “Beto lenda sala yawu.” Mpe ya kele kieleka. Mpe ba nataka kimbangi mosi ti ya vwandaka yinsi ya mbote.

55 Mu kele na kyese mingi na kimbangi yina, (beno ve?) ti ya kele na Yinsi ya mbote na zulu ya beto! Mpe beto kele na nzila ya beto, na nkokila yayi. Alleluia! Mbote mingi.

56 Awa bawu vwandaka, ntangu yayi, kaka ntete mpulusu. Nzambi lombaka bana ya Israel, ti bawu zolaka kieleka vwanda ya kukeba, na kufwaka mwana-dimeme yayi. Mpe kutula menga na zulu ya linteau, na zulu ya kielo, mutindu *yayi*, mpe konso dikunzi.

57 Mpe bawu zolaka kota mpe kudya mwana-dimeme yayi, konso kitini ya yawu; beno tala, mwana-dimeme nyonso, kaka kitini ya yawu ve. Ba zola kudya konso kitini ya yawu.

58 Bantu yankaka ke tuba, “Mu ke baka kaka kitini *yayi*, mpe mu ke—mu ke kwikila kitini *yayi*.” Kasi beno fwana baka Yawu nyonso, konso kitini ya Yawu. Bawu ke tuba, “Oh, mu ke kwikila ti Yandi lwalaka samu na masumu ya beto, kasi, ‘na bamputa ya Yandi,’ mu zaba ve yina me tadila Yawu.” Beto zola Yawu nyonso. Kitini nyonso ya Yawu kele ya kudya; nyonso ya Yawu. Ndambu ya Yawu ke kumaka ngolo, kasi beto fwana kudya Yawu, na mutindu nyonso. Nzambi tubaka yawu.

59 Beno tala nzila ya 10 ntangu yayi.

Mpe beno ke—beno ke bika kima mosi ve ya yawu kubikana tii...na suka; mpe yina ke bikana...tii suka...ke yoka na tiya.

60 Mpe, ntangu yayi, ata mosi ve ya yawu ke bikana; nyonso. Ntangu yayi, Yandi tubaka, “Ntangu beno ke kudya yawu, beno kudya ve yawu ya mubisu, to ya kutokisa na maza, kasi beno fwana kudya yawu ya kulamba mbote.” Mpe mu ke zolaka yawu.

61 Bantu ke mekaka na kudya Ndinga ya Nzambi, mpe bawu ke bakaka Yawu mutindu ti Yawu vwandaka ya mubisu; ke tafuna Yawu, mpe ke losa Yawu, mpe nyonso yankaka. Bawu ke tuba, “Oh, mu lenda kaka ve kubaka Yawu. Mu ke lenda Yawu ve.” Yawu me kuya mbote ve. Yimeni.

62 Yandi tubaka, “Beno lamba yawu na tiya.” Tiya ke monikisa Mpeve-Santu. Beno kuzwa ntete, Nzambi na kati ya ntima ya beno, mpe Yandi ke lamba Yawu samu na beno. Ya kele

kieleka. Beno lamba Yawu, mbote, na zeke-zeke, kuna Yawu ke meka mbote.

⁶³ Ntangu yayi, beno lenda ve kutelama mutindu *yayi*, na ngaanda, kutuba, “Oh, mu, mu zaba ve kana Yawu kele samu na munu, to ve. Ya lendaka vwanda ya bilumbu me luta.” Beno kuzwa kaka Mpeve-Santu, ntete, mpe beno tala mbote yinki kubeluka ya Kinzambi zola kutuba samu na beno kuna.

⁶⁴ Beno tala yina nsambulu ya kieleka ya ntima zola kutuba samu na beno kuna, ntangu beno kele na Mpeve-Santu awa samu na kulamba Mwana-dimeme na yina Yawu ke kwiza. Amen. Ya kele kieleka. Beno lamba ntete, Mwana-dimeme. Mpe beno fwana vwanda na Tiya na kulambila Yawu. Yawu fwana vwanda ya kuyoka. Oh, la la, ya kele ntangu Yawu kele mbote. Beno yoka Yawu, ya ke nyengisa kaka nyonso . . .

⁶⁵ Mu vwandaka ya kutelama awa, ntama mingi ve, na lweka ya kompani ya nene kisika ba ke yokaka bisengo, mpe mu talaka mutindu tiya tiya yina vwandaka, mpe ya vwandaka lamba kaka mpe kulamba mpe kulamba. Mpe mutindu tiya ya vwandaka kuma, mvindu na bisengo, na wolo, nyonso vwandaka kwiza na zulu, mpe ba vwanda katula yawu. Mpe na kompani yango ba zolaka bwela tiya mwa mingi. Mpe kuna ntangu yayi zolaka toka mingi, ba zolaka kuzwa kima mosi dyaka yankaka, pyrite mpe nyonso, kubasika na yawu.

⁶⁶ Kima ya ntete na kukwiza na zulu vwandaka mvindu, mutindu mvindu mpe poto-poto. Yina landaka na kukwiza na zulu vwandaka mutindu matadi ya ntalu, oh, kima ya mbote ve; mwa arza, mpe bima nyonso yayi, ya vwandaka kwiza na zulu, mpe ba vwanda katula yawu. Ba landilaka na kukulumuka, kaka kukulumuka, mpe kima ya nsuka ba basisaka na yawu vwandaka pyrite. Ya kele wolo ya yimbi.

⁶⁷ Beno zaba ya kele na bima mingi na bantu yina ke mekaka na kuvuna mosi na yankaka na ntangu beno kele Muklisto, to kusala mutindu yawu, na mutindu nyonso. Beno me mona? Kasi beno bika kaka Mpeve-Santu kukwenda tokisa nyonso, kubaka—kubasisa wolo nyonso ya yimbi na beno, mpe.

⁶⁸ Wolo ya yimbi, bantu mingi ke kwendaka na Wesete mpe bawu ke tala ndambu ya yawu, mpe bawu ke banza, oh, bawu me tuka mine ya wolo. Ya ke lezimaka mingi kulutila mutindu ke salaka wolo. Kasi ya kele wolo ya yimbi, ya kele na ata luvalu na yawu ve.

⁶⁹ Mpe ntangu yayi ba ke lamba yawu, mpe ba ke katula yawu nyonso, mpe ke landila kaka na kulamba yawu mpe kulamba yawu, tii ya ke kuma wolo ya kieleka, na nsuka nkama na zulu nkama ya wolo ya kieleka.

⁷⁰ Mpe ya kele mutindu Nzambi ke salaka na kati ya Dibuundu ya Yandi, ke tsyamuna Mpeve-Santu na zulu ya Yawu, mpe ke lamba na yisi na kati kuna tii Yandi ke losa na ngaanda nyonso

ya bima ya yinza, mpe baluswaswanu, mpe munimi, mpe nyonso yayi, tii Yandi ke tokisa na kubasisaka yawu na konso muntu yina ke kwiza na Yandi. Amen.

⁷¹ Ntangu yayi, kuna, beno lenda kudya yawu. Awa kele dibanza yankaka ya kitoko awa, na—na nzila ya 11.

Mpe mutindu beno ke kudya yawu; na ya beno . . . (beno kuwa yayi) . . . luketo ya kukanga, . . . (Mu zola yawu) . . . basapatu na makulu ya beno, . . . nkawa na diboko ya beno; mpe beno ke kudya yawu na mbangu; ya kele paki ya MFUMU.

⁷² Mu zola yawu. Na yina beno ke na kudya, beno kubama na kukwenda. Yawu yina dyambu.

⁷³ Beto baka Ephésiens, na kapu 6 ya Ephésiens, mpe kutala na kati awa yina Paul tubaka na yina me tala na kukumisa Dibuundu ya kukubama; kapu 6 ya Ephésiens, kubanda na nzila ya 14 ya kapu 6.

Beno telama na yawu, na kuvwandaka na luketo ya beno singa mutindu kieleka, . . . kulwata kinkuti ya kisengo ya ntulu ya ludedomo;

. . . makulu ya beno ya kulwata kukubama ya nsangu ya mbote ya ngemba;

Mpe na zulu ya bima nyonso, kubaka kisengo ya nkebolo nzutu ya lukwikilu, na yina beno lendaka kufwa tiya . . . ya madyonga ya muntu ya yimbi.

Mpe beno baka yimpu ya kisengo ya mpulusu, mpe mbele ya yinda ya Mpeve, yina kele ndinga ya Nzambi:

⁷⁴ Beno me mona Paul ke na kulwatisa muntu samu na bilanga ya mvita, samu na kutambula.

⁷⁵ Nzambi, na mbandukulu, na luvulusu ya Israel, Yandi tubaka, “Ntangu yayi beno fwana kukubama samu na kutambula. Ntangu beno ke kwiza na yisi ya menga, beno lwata basapatu ya beno. Beno kanga singa na luketo ya beno. Beno baka nkawa na diboko ya beno mpe beno vwanda ya kukubama samu na mbokolo.” Mu zola yawu.

⁷⁶ Muntu ntangu yayi, ntangu yandi ke kwizaka na Klisto, yandi ke lwataka basapatu ya yandi ya Nsangu ya mbote, samu na kulonga Nsangu ya mbote; ke lwata yimpu ya kisengo ya mpulusu; kinkuti ya kisengo ya ntulu ya ludedomo; ke kanga singa na luketo ya yandi. Ya kele . . .

⁷⁷ Bantangu mingi, na basoda ya ntama, ntangu ba vwanda lwataka binwaninu yina ya mvita, ba vwanda vwandaka na mukaba ya nene. Ba vwanda kangaka yawu kintwadi, na kusimbisaka na luketo ya bawu, binwaninu ya kisengo yayi, samu na kukebama na madyonga ya bambeni. Wapi dilongi ya kieleka ya kele samu na beto. Mpe ntangu luketo vwandaka

lemba, na kubwa, to kinwaninu ya kisengo, ba zolaka kanga dyaka mukaba ya bawu, mpe kumatisa dyaka yawu.

⁷⁸ Wapi kizizi ya kulunga, ya bubu yayi, ntangu beno ke banda na kutala mutindu ti beno ke na kulemba, to dyabulu ke tuba, “Ya kele na mfunu ve.” Beno kulumusa diboko mpe beno kanga mukaba mwa fyoti dyaka; beno simba mbele ya yinda mwa ngolo mingi na diboko, mpe beno kwenda na ntwala. Mu zola yawu, beno kubama samu na kutambula.

⁷⁹ Muntu nyonso vwandaka tambula na yisi ya menga yina, na mpimpa yina, kuzwaka lutumu ya kuvwanda kuna, na kubasika ve tii balutumu ke kwiza, samu na kutambula.

⁸⁰ Mpe muntu nyonso yina me butuka na Mpeve ya Nzambi, ke kota na Klisto, kele na Luzingu ya kukonda nsuka; ke lwata kinwaninu ya kisengo ya yandi ya nkebolo nzutu, kinkuti ya yandi ya kisengo ya ntulu, ke telama ya kukubama, mpe ba me nimina na kukwenda kana ti kuzwa balutumu ya kutambula.

⁸¹ Oh, ya kele ve ya kuyituka? Beno kele ve na kyese ti beno me kuzwa yawu nyonso ya kukangama, na nkokila yayi, beno basoda?

⁸² Beto vwandaka na ntwadisi bankunga mosi na tabernacle, nkunga ya beto ya ntangu mingi vwandaka:

Bitumba me landa, O basoda ya Baklisto,
Kizizi na kizizi na mulonga ya kukangisa,
Na kinwanunu ya kungenga, babendele ke
pepa,
Mbote mpe kieleka ke na kunwana bubu yayi;
Bitumba me landa, kasi beno vwanda ya
kulemba ve,
Beno vwanda na ngolo mpe beno kanga ngolo
ngolo ya Yandi;
Kana Nzambi kele samu na beto, bendele ya
Yandi na zulu ya beto,
Beto ke yimba nkunga ya lunungu na nsuka.

⁸³ Mingi ya basantu yina ya ntama kwendaka na ntoni. Kasi mosi ya bilumbu yayi, kuna na yinza ya malu-malu, ntangu bawu ke kwiza na Yinsi ya nsilulu, bendele ya kulunsi ke vwanda na zulu ya beto, mpe beto ke yimba nkunga ya lunungu. Ntangu beto ke vwanda na Madya ya Makwela na nkokila yina, na ziunga ya mesa, mesa yina ya nene, mu banza ya yinda mafunda nkama mosi ya bakilometele, na basantu ya kusukula na Menga ya kuvwanda na ziunga kuna. Mu zola kukwenda mesa nyonso mpe kupesa mbote na mosi na mosi ya bawu, amen, kaka na kubokaka. Beno zola kuwa munu kuboka? Beno vingila tii mu ke kuma kuna; beno tala munu mbote. Mu me kula ntete, mingi ve, samu na yayi.

Kasi, beno tala, na yina me tala kutambula ntangu yayi. Beno kubama. Beto ke kwenda.

84 Beno tala kizizi ya kyadi, ntete beto kota na lesu ya beto ya ntangu nyonso, ya kele na nzila ya 38 kuna. Beno kuwa.

Mpe nkonga ya bantu ya kuvukana mataka na mameme ya bawu. . .

85 Ya kele kisika Israel salaka kyeta. Kimpeve kusalamaka. Bantu ya kukondwa kundima landaka samu na kimpeve, na nsuka natilaka bawu mpasi. Mpe na yisi, beto ke tala awa, mu banza na nzila ya 42 mpe nzila ya 43. Mfumu kuzonza na Moise, kutubaka, ti, “Muntu ve kasi bawu yina pesamaka na munkayulu. . . zolaka kudya munkayulu,” mu zolaka tuba, “kasi bawu yina kuzwaka nzengolo. Banzenza ve, bantu ya ngaanda ve, muntu ve zolaka baka yawu kasi bawu yina kuzwaka nzengolo.”

86 Mpe wapi kukondwa lemvo yina kele na beto bubu yayi, na kilumbu yayi, bankundi ya luzolo; ti ntangu, na dibuundu, muntu nyonso yina kele ya dibuundu ke baka kominyo. Mpe yina kele yimbi. Kaka bawu yina kele ya kuvulusa, bawu yina nyonso kele ya kulunga.

87 Ésaïe zonzaka mpe tubaka, “Bamesa ya Mfumu ke vwanda ya kufuluka na biluki.” Yandi tubaka, “Nani mu ke longa Malongi? Bayina me bika mabene.” Yandi tubaka, “Lutumu fwana vwanda na zulu ya lutumu; musiku na zulu ya musiku; awa fyoti, mpe kuna fyoti.” “Mpe beno kangama na yina kele mbote.” Nzambi na kuzonzaka, kuzabaka ti kilumbu yina beto ke na kuzingaka, ti dibuundu ke vwanda ya bantu mingi ya politiki, tii bawu ke bika nyonso, bantu, kukota; kana kaka ti bawu kele na nkumbu ya bawu na buku ya dibuundu, ba vwandaka bamambeke, ba bakaka kominyo.

88 Mpe Biblia ke tuba, “Yandi yina ke kudya mpe ke kunwa yawu, kukondwa ya kulunga, kele ya kuzaba dyambu na nzutu mpe Menga ya Mfumu.”

Santu Jean, kapu 13, Yesu ke na kuzonza.

89 Ya Zole ya Corinthiens kapu 11, Paul ke tuba, bamvula na ntwala, ti, “Yandi yina ke kudya mpe ke kunwa yayi, kukondwa ya kulunga, ke vwanda ya kuzaba dyambu na nzutu mpe Menga ya Mfumu. Ti muntu kukifyongonina yandi mosi,” yandi ke tuba, “ntete yandi baka.” Mu ke na kutangaka Masonuku. Ya kele kieleka. “Yandi yina ke kudya mpe ke kunwa, kukondwa ya kulunga, ke kudya mpe ke kunwa kitumbu samu na yandi mosi, na kuzitisaka ve nzutu ya Mfumu. Mpe samu na dyambu yayi mingi kele ya kubela mpe kele ya kulemba na kati-kati ya beno, mpe mingi ya kulala.” Beno ndima ti beno kele ya telema ya kusungama na Nzambi.

90 Yawu yayi na kivudi, ti, muntu ve kasi yina kuzwaka nzengolo! Ata mutindu ya kusungama yandi vwandaka, mutindu yandi sadisaka dibuundu ya Bazwife; yandi zolaka vwanda mukwikidi ya malu-malu, zolaka vwanda mukwikidi ya kieleka

yina kuzwaka nzengolo, ntete yandi baka kominyo, to kudya paki. Oh, mutindu ntama beto me katukila nzila bubu yayi!

⁹¹ Ntangu yayi beto kwenda mbangu, kuna. Mpe na nkokila yayi Nzambi basisaka bawu. Beto ke luta ntangu yayi na nzila ya 13 ya kapu 14.

⁹² Nzambi pesaka bawu Dikunzi ya Tiya samu na kukwenda na ntwala ya bawu. Mu banza ti bawu vwandaka na foto awa, na nkokila yayi. Mpe mu ke tuba yawu na buzitu. Na dibanza ya munu ya kieleka, na yina beto kele awa na kati ya kimvuka yayi na nkokila yayi, mu ke kwikila ti Yawu kele na beto na nkokila yayi. Dikunzi ya Tiya mosi yina twadisaka bana ya Israël, ke na kukwendaka na ntwala ya beto, na kusalaka bidimbu mpe mambu ya ngitukulu mosi. Mpe mulongisi nyonso awa, to kizabi ya Biblia, zaba ti Wanzio yina vwandaka landa Israël mpe twadisaka bawu na yinsi ya nsilulu, vwandaka Wanzio ya Ngwisani, yina vwandaka Yesu Klisto.

⁹³ Mpe, bubu yayi, “Yesu Klisto mutindu mosi mazono, bubu yayi, mpe ntangu nyonso” ke na kulandaka kimvuka yayi yina beno zola kubokila ba-exalté, kana beno zola. Mbote mingi. Yandi ke landila, na kutwadisa lunungu na lunungu! Nkembo na Nzambi!

⁹⁴ Na kati ya bayinsi yina, na bilumbu yina, ba vwandaka ya kuvweza mpe ya kuyina mpe ya kumanga, mpe vwandaka ya kumanga na bayinsi, mpe kuzwaka nkumbu nyonso.

⁹⁵ Mutindu mosi ya kele bubu yayi, na mukwikidi ya kieleka. Beno, na kati ya mabuundu ya beno, beno zaba, ntangu beno ke baka ntelamanu mosi samu na Klisto mpe kuzonza Kieleka, dibuundu ya muvimba ke tuba, “Beno tala yandi! Yandi me zimbisa mabanza ya yandi. Yandi me kuma kilawu.” Beno me mona?

⁹⁶ Beno landa yawu ve. Beno landila. Beno kele ya muvimba ya kulwata binwanunu ntangu yayi. Mpe Menga ke na kuluta na ntwala ya beno; Mpeve-Santu ke na kutwadisa beno. Beno landila kaka na kutambula. Beno landa ve yina muntu ke tuba na beno. Beno tala mbala mosi na Calvaire, mpe beno landila na kutambula. Kifwanukusu ya kitoko!

⁹⁷ Ntangu yayi, ba basikaka, na nzila, mpe kuzwaka . . . Mpe ntangu yayi beno tala, menga vulusaka bawu na Égypte, ntangu yayi ba zolaka kuzwa kima yankaka ntangu yayi samu na kukotisa bawu na yinsi. Ntangu yayi bawu ke na kubanda kaka. Bawu basikaka, kuzwaka nzengolo, kwizaka na yisi ya menga, mpe kuna na kutambula. Ntangu yayi ba kumaka na kima mosi. Ba vwandaka kwenda na ntwala kuna, na kuzabaka ti ba me luta lufwa na luzingu; na kuzabaka ti ba kuzwaka Luzingu ya Seko.

⁹⁸ Kasi bawu yayi awa, ke na kukwiza ntangu yayi, mpe mpasi me banda na kutelama. Awa me kwiza basoda ya Pharaon, ke na kulandaka bawu, samu na kuzwa bawu. Mpasi me kota.

⁹⁹ Beno kuwa! “Nzambi kele kiswamunu ya beto mpe ngolo ya beto, lusalusu ya kieleka na ntangu ya mpasi.” Oh, mu banza ti beno ke mona yayi. Beno me mona? Yawu yayi. Beno zaba . . . Kasi, beno kuwa, nzila ya 13 ntangu yayi.

Mpe Moise tubaka na bantu, Beno vwanda na boma ve, . . .

¹⁰⁰ Mu zola yawu. Na manima Yesu vumbukaka na lufwa, Bandinga ya Yandi vwandaka ntangu nionso, “Beno vwanda na boma ve.”

¹⁰¹ Yawu yina dyambu na Dibuundu bubu yayi, kele na boma ya lufwa beno ke kubwa. Wapi mutindu beno lenda kubwa ntangu beno kele na kati ya Klisto? Beno lenda kubwa ve. Beno kele na Luzingu ya kukonda nsuka. Bampeve nyonso ya yimbi na difelo lenda ve kuningisa beno. Beno kele na Luzingu ya kukonda nsuka. Yesu tubaka yawu. Na yawu beno vwanda ve na boma ya kubwa.

¹⁰² Beno ke tuba, “Mbote, mu ke na boma ti mu ke vwanda fanatiki.” Mu ke zola mingi kuvwanda na mwa bufanatiki ti kuvwanda swi mpe kusala kima ve. Kieleka mu ke sala. Muntu yina ke sala kima mosi . . .

¹⁰³ Ba ke zonzilaka na Ballard awa, muntu kwizaka na kuzwa kisalu na yandi, mpe yandi tubaka, “Tula kidimbu ya nge awa.” Yandi bakaka kilapi ya yandi, samu na kutula kidimbu. Yandi tubaka, “Wapi kisika kele gome ya nge?”

Yandi tubaka, “Mu ve . . . ke salaka ve zimbani.”

Yandi tubaka, “Mu lenda sadila nge ve; nge ke sala kima mosi ve.”

¹⁰⁴ Ya kele kieleka. Beno ke salaka ata zimbani ve, beno ke—beno ke sala kima mosi ve. Beto kwenda, mpangi. Beto telama mpe beto kota na kisalu. Mu ke zolaka Longfellow kuna:

Kutuba na munu ve, na bantalu ya mawa,
Luzingu kele kasi ndosi ya mpamba!
Mpe moyo kele ya kufwa yina ke na kulala,
Mpe bima kele ve yina ba ke banza.

Tubaka:

Yinga, luzingu kele kieleka! Mpe luzingu kele
lufutu!
Mpe ntoni kele ve lukanu ya yawu;
Nge kele putulu, nge ke vutuka na putulu,
Ba me tuba yawu ve samu na moyo.
Beto telama mpe beto kota na kisalu,
Na ntima samu na kunwana nyonso;
Beno vwanda ve mutindu mameme ya kufwa
makutu, yina ba ke na kutwadisa!
Beno vwanda héro!

105 Beno vingila ve na bantu na kundimisa beno na Klisto. Beno telama mutindu bakala to mama, beno ndima Yandi, mpe beno kwenda na ntwala na lunungu. Amen. Ya kele yina Nzambi zola, basoda ya ngolo, ya kukubama. Beno lendaka vwanda ve, na bakilo makumi sambwadi na tanu, kasi beno lendaka vwanda dyaka na ngolo, mpangi, mpe ya kufuluka na ngolo, kana beno ke bika kaka Nzambi kuzwa nzila ya Yandi. Mu monaka muntu yina vwandaka na bakilo nkama mosi, vwandaka ve na kilo ya muntu na kati ya yandi. Ya kele kieleka. Mbote mingi. Beno tala.

. . . Moise tubaka na bantu, Boma . . . ve, beno vwanda swi, mpe beno mona mpulusu ya MFUMU, . . .

106 Yina kele mbote. Beno kwenda kaka na ntwala. Beno vwanda na boma ya kima mosi ve. Kana beno me ndima Klisto mutindu Mvulusi ya beno, beno landila na kukwenda.

107 “Mpangi Branham, mu zola mbotika ya Mpeve-Santu.” Beno landila kaka na kutambula. Beno vwanda na boma ve.

108 Beno ke tuba, “Mu kele ya kubela ntangu yayi, Mpangi Branham. Mu lenda kwenda ntama mingi ve.” Beno kulemba ve. Beno landila kaka na kukwenda na ntwala; beno mona mpulusu ya Mfumu ya beto! Beno ndima yawu. Beno kwenda kaka na ntwala.

109 “Wapi mutindu ya ke vwanda? Dokotolo me manga munu.” Ntangu yayi, muntu yina me sala nyonso yina yandi lendaka sala, kasi Nzambi me sala ntete ve ya Yandi nyonso. Ya kele kieleka.

110 Kaka ntangu fyoti, beno kuwa yandi ntangu yayi. Mbote mingi.

. . . MFUMU, yina yandi ke talisa na beno kilumbu yayi: samu na ba-Egyptien (minwani, kiele-. . . bisadi-muvusu) . . .

111 Beno ke tuba, “Mpangi Branham, kana mu lendaka kaka kubika kunwa tabaka! Kana mu lendaka kaka kubika kunwa! Kana mu lendaka kaka kubika muyibi ya munu! Kana mu lendaka kaka kubika kusala yayi, yina, mpe yankaka.” Kulemba ve. Landila kaka na kutambula. Nzambi ke tala nyonso ya yawu.

112 “Kana mu zabaka ti mu lendaka sala yawu, Mpangi Branham, mu zolaka ndima Klisto kaka na ntangu yayi.” Beno vwanda na boma ve. Beno kwenda na ntwala. Beno kwenda kaka na ntwala. Beno ke mona mpulusu ya Mfumu!

. . . samu ba-Egyptien yina beno me mona kilumbu yayi, beno ke mona dyaka bawu ve. (Amen. Yawu ke mana, na manima ya mwa ntangu fyoti.)

MFUMU ke nwana samu beno, mpe beno ke vwanda . . . beno vwanda swi.

Mpe MFUMU tubaka na Moise, Samu na yinki nge ke boka na munu? zonza na bana ya Israel, ti bawu kwenda na ntwala: (Mu zola yawu.)

113 Beno meka ve na kutuba, kutuba, “Mbote, mu kele ya dibuundu, ya me luta bamvula kumi, Mpangi Branham. Mu me vwanda mambele mosi ya mbote ya kukwikama.” Yina kele mbote; mu ke sepela na yawu. Kasi beto landila na kukwenda, na nkokila yayi. Nzambi ke na kulandila na kukwenda. Bantu bubu yayi, awa, bawu ke vutuka, bawu ke tuba, “Mbote, ntangu yayi. . .”

114 Science, nkama mosi na makumi tanu ya bamvula me luta; ya vwandaka na muntu mosi ya science na France, yina tubaka, “Kana muntu lendaka kwenda mbangu na mutindu ya ngitukulu bakilometele makumi yiya na nana na ngunga mosi, ngolo ya kubenda ke katula yandi na ntoto, mpe yandi ke kwenda.” Huh! Bakilometele makumi yiya na nana na ngunga mosi? Yandi ke na kukwendaka na kutala bakilometele mafunda zole na bankama tanu na makumi sambwadi na tanu na ngunga mosi ntangu yayi. Beno me kuwaka ntete ve science kutala dyaka na muntu yina. Yandi vwandaka mbote mingi na kilumbu ya yandi, kasi bawu ke na kuzinga na kilumbu yankaka. Ya kele kieleka.

115 Kasi, beto milongi, oh, ve. “Kubeluka ya Kinzambi? Ntangu yayi beno bika mu mona yina—yina Santu Moody, Finney, Knox, Calvin, mosi na kati ya bawu tubaka samu na Yawu.” Ba vwandaka mbote mingi na bilumbu ya bawu. Kasi beto ke na kulandila na kukwenda, na kukwendaka na ntuala. Beto kele na kima yankaka.

116 Yesu tubaka, na kingana yina kuna, ya mukuni, ntangu mukuni basikaka mpe mwangaka bankuna. Mpe yankaka. . . Mbeni kwizaka mpe mwangaka mwa matiti ya yimbi na kati ya blé. Yandi tubaka, “Beno bika bawu kuyela kintwadi.”

117 Beno ntangu nyonso ke talaka mutindu yimbi yinza ke na kukumaka, kasi beno lenda ve kumona mutindu ngolo Dibuundu ke na kukuma, na ntangu mosi. Yandi ke na kumata, ke telama na bilanga. Oh, Yandi kele mwa mameme, kasi, mpangi ya bakala, Nzambi kele na Yandi. Mpe Yandi ke nunga kaka mutindu mosi Klisto vumbukaka na lufwa. Amen. Dibuundu ya Nzambi ke kubwa ata mbala mosi ve. “Myelo ya difelo ke nunga Yawu ve.” Ya ke lakisa ti bawu ke telemina Yawu, kasi bawu lenda nunga ve. Dibuundu ke nunga, na nzila ya Menga ya Yesu Klisto, na kutambula ya lunungu. Mu ke kwikila na kima yayi, ti Nzambi ke vwanda na Dibuundu ya kukondwa ditona, na mifutu, to kifu. Amen. Mu kele na kyese mingi samu na yawu.

118 Ntangu yayi, “Kana mu kele na kati ya Dibuundu yina.” Amen. “Mpangi Branham, wapi mutindu beno ke kota na kati ya Yawu, na nzila ya mukanda?” Ve. “Wapi mutindu beno ke kota na kati ya Yawu?” Na nzila ya Mbutukulu; kubutuka na kati ya Yawu!

119 Mu kele na kati ya dibuta ya ba-Branham, ya ke sala bamvula makumi yiya na tanu, na kilumbu ya sambanu ya

ngonda Yiya yayi yina ke na kwiza, mpe ata mbala mosi ve ba me yufulaka munu na kukota na dibuta ya bawu. Mu butukaka Branham. Mu ke vwanda ntangu nyonso Branham.

¹²⁰ Mu butukaka Muklisto, na kati ya Yesu Klisto. Mu ke vwanda Muklisto, samu ti Nzambi salaka yawu mutindu yina, na nzila ya nsodolo. Yandi bokilaka beto, na nzila ya lemvo ya Mwana ya Yandi Mosi ya luzolo. Beto ndimaka Yandi mpe kuzwaka Luzingu ya Seko. “Na nzila ya kupesanaka mbote mosi?” “Na nzila ya bumambele mosi?” “Na nzila ya mukanda mosi?” “Na nzila ya Mpeve mosi beto nyonso kele ya kubotama na kati ya Nzutu mosi, Yesu Klisto,” mpe kuna kukuma bantu ya yinsi ya Kimfumu.

¹²¹ Mu vwandaka banza bubu yayi, na yina mu vwandaka sambila, ti mutindu ti yayi kele kilumbu yina beto fwana pesa mvutu. Mu ke pesa ve mvutu samu na nsungi yina vwandaka na ntwala ya munu, to nsungi yina ke vwanda na manima ya munu. Kasi, na Lufundusu, mu ke telama na nsungi yayi. Mpe mu tubaka, “Tala kuna, foto ya kento mosi na zulu ya pano, vwanda kunwa byele, kima mosi ya mutindu, ba tubaka yandi vwandaka ‘pema mbote ve,’ to kima mosi.” Mu tubaka, “Yinga, mpe ya kukondwa Luzingu, mpe.” Mbote mingi. Beno bawu yayi. Mu tubaka, “Wapi nsoni!”

¹²² “Na malongi nyonso,” mu tubaka, “bantangu yankaka ya ke monana,” mu tubaka na kento ya munu, mu tubaka, “bantangu yankaka ya ke monana ti ya ke sala ata mbote ve. Kasi mu fwana vwanda ndinga ya kukebisa, na mutindu nyonso, ata nyonso yina bantu ke salaka na yawu. Mu fwana longa Nsangu ya mbote, na mutindu nyonso, mpe kupesa kimbangi na mvumbukulu mpe Ngolo ya Yesu Klisto.” Beno bika bawu kumanga Yawu, mpe kupesa mukongo ya bawu; Nzambi ke fundisa bawu na Lufundusu samu na yawu. Mu kele kaka na kizitu ya kulonga, mpe milongi yankaka mpe, bayina ke longaka Nsangu ya mbote.

¹²³ Ntangu yayi, mu ke zolaka kaka Yawu. Beno tala, “Beno kwenda na ntwala ntangu yayi,” mpe beno ke mona nkembo ya Nzambi. Kasi, beno kuwa, nzila ya 16 ntangu yayi. Beto ke tanga yayi.

Kasi telemisa . . . nkawa, . . .

¹²⁴ “Nkawa,” yina vwandaka nkawa ya lufundusu. Ntangu yayi, ya vwandaka ve nkawa ya Moise. Ya vwandaka nkawa ya Nzambi. Kana beno tala, Moïse, yandi me baka nkawa yina, yandi me telemisa yawu mutindu *yayi*, bankasa me kwiza. Yandi me telemisa yawu na zulu ya maza, yawu me kituka menga. Yawu vwandaka nkawa ya lufundusu ya Nzambi. Mpe nkawa mosi yina . . . Beno simba yawu! Ya vwandaka na nkawa mosi yina ti yandi bulaka ditadi; mpe dibulu basikaka na lweka ya ditadi, mpe bamaza basikaka na ditadi.

125 Ntangu yayi, ditadi yina vwandaka Klisto, mpe ya vwandaka lufundusu ya Nzambi. “Kilumbu beno ke kudya yawu, kilumbu yina beno ke kufwa.” Yandi bulaka Klisto na Calvaire, mpe futaka lufwa yina ya yimbi, ya mawa. Muntu ve, lendaka tuba yina yawu vwandaka, to mbala mosi yina ya ke vwanda. Kuna Nzambi tulaka lufundusu nyonso ya Kinzambi na zulu ya Yandi, mpe bulaka Yandi na lweka, ntangu basikaka na lweka ya Yandi maza mpe Menga mpe Mpeve, samu na mpulusu ya beto.

126 Mutindu bantu ke fikulaka foto ya Yandi, ntangu yankaka, na robe ya kuzungidila Yandi, to kima yankaka, na zulu ya kulunsi. Ya kele mutindu yina ve. Bawu kukumisaka Muntu yina, kima nyonso ya yimbi, ya mvindu yina bawu lendaka kusala; kasi Yandi zolaka luta na yawu. Yandi vwandaka kuna, ya kulutula zulu mpe ya kulutula mbote na nyonso ya yinza, na yina nyonso vwandaka to ke vwanda. Mpe kuna vwandaka ya kutula, kinkonga, na zulu ya kulunsi; vwandaka ya kulwala, ya kubula, vwandaka basisa menga; mante ya biseki vwanda kubwa na kizizi ya Yandi; yimpu ya bansende ya kuseka na zulu ya yintu ya Yandi. Kasi ya kele ntangu Yandi nungaka lufwa, difelo, disumu, kimbevo, mpe ntoni, mpe futaka ntalu samu na beto nyonso.

127 Ba ke tubaka bambala mingi, ntangu yankaka, “Ya kele kisika Yandi katulaka ntunga ya lufwa.” Ya kele kisika yina Paul tubaka, “O lufwa, wapi kisika kele ntunga ya nge?”

128 Ba me tubaka na munu ti bitutu, banyosi mpe bima mingi, ba kele na ntunga, mpe ya kele na ndikila, na yawu. Kasi mbala mosi ba me tobola, ba ke zimbisa ntunga ya bawu.

129 Lufwa vwandaka na ntunga na kati ya yawu, kilumbu mosi; kasi Klisto, na Calvaire, bakaka ntunga yango na lufwa. Alleluia! Oh, ntangu mu ke banza na yawu! Kuna Yandi bakaka ntunga na lufwa, samu na munu mpe beno, ntunga nyonso ya lufwa.

130 Paul tubaka, ntangu ba zolaka zenga yandi yintu, na boloko na Rome, yandi tubaka, “Lufwa, wapi kisika kele ntunga ya nge?” Yandi vwandaka lakisa na kuvutukaka na Calvaire, mpe ya kele kisika ntunga kubakamaka na lufwa. “Ntoni, wapi kisika kele lunungu ya nge?” Yandi tubaka, “Kasi matondo na Nzambi, yina ke pesa beto lunungu na nzila ya Mfumu ya beto Yesu Klisto.” Amen. Mbote mingi.

. . . nkawa (lufundusu), mpe ya kutandama kuna . . . me fuka mubu, mpe me kabula yawu: mpe bana ya Israel ke tambula na zulu ya ntoto ya kuyuma na kati-kati ya mubu.

Mpe Munu, tala, Mu ke kumisa ngolo ntima ya bantu ya Egypte, mpe ba ke landa nge: mpe Mu ke kuzwa lukumu na zulu ya Pharaon, mpe na zulu ya basoda ya

yandi nyonso, mpe na zulu ya bapusu, mpe na zulu ya minati-bampunda.

Mpe ba-Égyptien ke zaba ti Mu kele MFUMU, mpe Mu me nunga lukumu ya Pharaon, mpe na zulu ya bapusu ya yandi, mpe na zulu ya minati-mpunda ya yandi.

Mpe wanzio ya Nzambi, . . .

¹³¹ Beno kuwa! Beno yidika binwanunu ya beno ntangu yayi. “Mpe Wanzio ya Nzambi, yina vwandaka kwenda na ntwala ya kan ya Israel,” Yandi kele dyaka awa.

. . . wanzio ya Nzambi, yina kwendaka na ntwala ya kan ya Israel, katukaka mpe kwendaka na manima ya bawu; mpe dikunzi ya dituti kwendaka ntama na ntwala ya kizizi ya bawu, mpe telamaka na manima ya bawu: (to, kwendaka na kukatukaka awa, mpe telemaka na manima kuna; mukwendi ya kati-kati na ntangu ya mpasi.)

¹³² Ntangu mpasi ke banda na kukutana na beno, kimbevo na lweka nyonso, mpasi, Wanzio ya Nzambi ke kwiza, ke vwanda na kati-kati ya beno na kimbevo, mpe ke telama kuna na nzila, ke bokila beno na kubaka Ndinga ya Nzambi.

¹³³ Nzambi pesaka Israel nsilulu, ti bawu ke kota na yinsi. Ya vwandaka na mafuku, na kutala, ya bantu, yina vwandaka kwiza, samu na kulanda bawu mpe kubwila bawu, mpe kufwa bawu, mutindu nkonga ya baniama. Kasi Wanzio ya Mfumu, Yina vwandaka kuna samu na kunata bawu na yinsi ya nsilulu, telemaka na kan mpe kwendaka mpe telemaka na kati-kati ya bawu na kima ya boma.

¹³⁴ Alleluia! Yandi ke salaka dyaka yawu. Yandi ke sala nzila. Oh, mu ke zolaka kaka Yandi na yawu, mutindu yina ve? Yandi ke sala nzila samu na konso mbevo yina me vwanda awa na ntangu yayi. Yandi salaka yimeni nzila, mpe Yandi me telama na kati-kati ya beno mpe mpasi.

¹³⁵ Mpe mu zaba ti Yandi kele awa na ntangu yayi. Beno lenda bokila munu fanatiki kana beno zola; Mu ke na kizitu ve na yina beno ke tuba. Kasi mu ke na kizitu na yina mu ke tuba, na ntwala ya Nzambi. Kasi Yandi Yina twadisaka bana ya Israël, kana mu me fundisa yawu kieleka, na Nsemo yina beno ke mona na nkokila yayi, to monaka na foto yina. Mu banza ti ba me tula yawu na ngaanda na nkokila yayi. Wanzio yango mosi ya Nzambi kele na kati ya kivinga kaka ntangu yayi, samu na kusala kaka kieleka yina Yesu salaka na kilumbu yina. Yandi kele awa samu na kusiamisa. Kaka yina Yandi salaka na ntangu yina, Yandi kele ntangu yayi, mpe ke vwanda ntangu nyonso mutindu mosi. Wanzio ya Nzambi, yina ke na kwenda kutelama na kati-kati ya beto mpe kimbevo, ke telama na kati-kati ya beto na lufwa.

136 Kuyituka ve ti David tubaka, “Yinga, ata ti mu tambula na kati ya biwanda ya kivudi ya lufwa, mu ke vwanda na boma ve: samu ti Nge kele na munu.” Ya kieleka.

137 Ya kutelema kuna, Wanzio ya Nzambi kwendaka na ntwala ya kan ya Israel, mpe katukaka, mpe kwendaka mpe telamaka na kati-kati ya bawu mpe mbeni.

138 Mpe Wanzio ya Nzambi kele ya kutelama, na nkokila yayi, na kati-kati ya konso muntu awa mpe mbeni. Mu zaba yina mu ke na kuzonzila. Mu zaba, na yina ya kutelama awa na estrade, na ntwala ya mwa nkonga yayi ya bantu na nkokila yayi, Mu zaba ti Nzambi me kulumuka, me kulumuka na Nkembo, mpe me telama na kati ya yinzo yayi ntangu yayi. Kana beno lendaka kaka kubasika na Ndinga ya Nzambi, beno mona kana Yandi lenda ve kukwenda na ntwala ya beno. Beno tala mbote.

139 Mpe Yawu kwendaka na kati-kati ya kan mpe ba-Egyptien. Yandi ke na kukwiza na kati-kati ya beno mpe kimbevo ya beno. Yandi ke na kutelama na kati-kati ya beno mpe masumu ya beno, kaka ntangu yayi. Samu na yinki? Beto kele na exode ya Dibuundu. Egypte vwandaka ntangu nyonso ya kubokila yinza, mpe ntangu Israel basikaka na... Beno bambuka moyo, bawu vwandaka bamambeke ya dibuundu kuna. Kasi na manima menga mpe kukatula-masumu kusalamaka, ba kumaka nzengolo ya Nzambi.

140 Mpe nzengolo, bubu yayi, kele mbotika ya Mpeve-Santu. “Nyonso,” Étienne tubaka, “beno bantu nyonso yina me kuzwa nzengolo ve na kati ya ntima mpe makutu, samu na yinki beno ntangu nyonso ke teleminaka Mpeve-Santu? Mutindu batata ya beno kusalaka, mutindu mosi beno.” Mpeve-Santu ke zengaka na kati ya ntima, na kukatulaka bima ya yinza. Ya vwanda vwandaka mutindu ya ntama ya kuzinga ya yawu ya dibuundu ya busantu, na kusalaka mutindu yina, na kuzingaka mutindu yina. Kasi, bubu yayi, ya kele kaka mutindu yinza ya muvimba. Ya kele nsoni. Beto me bwisa bibaka.

141 Mpangi Creech vwanda tubaka, nkundi mosi ya munu ya kiboba ya Méthodiste, yandi vwanda yimbaka nkunga mosi:

Beto me bwisa bibaka, beto me bwisa bibaka,
Beto me kakula na disumu.
Beto me bwisa bibaka, mameme me basika,
Wapi mutindu bankombo me kota?

142 Samu ti beno ke bwisa kibaka! Kaka yina. Beno me bwisa mutindu ya kulunga ya kuzinga ya Miklisto, samu ti baseminere me basisa mwa milongi mpe me fidisa bawu na kubebisa Kieleka. Kasi Mpeve-Santu ke vwandaka ntangu nyonso kuna samu na kubedisa disumu, mpe kele na nkokila yayi ya kutelama na kati-kati ya mukwikidi mpe bima ya yinza. Amen.

Mpe yawu kwizaka na kati-kati ya kan mpe ba-Egyptien mpe kan ya Israel; mpe ya vwandaka dituti ya

mpimpa samu na bawu, kasi ya vwandaka pesa nsemo na mpimpa na bayayi: samu ti mosi ve kukwiza pene-pene yankaka mpimpa ya muvimba.

¹⁴³ Beno tala, kima mosi yina vwandaka pesa nkonga yayi ya bakwikidi, Nsemo, vwandaka kufwa meso ya bawu.

¹⁴⁴ Mbote, beno lwata gilet ya beno ya antichoc. Yawu yayi ke kwiza. Beno tala, muntu nyonso yina ke manga Nsemo ke kuma mpofu mpe ke tambula na kati ya mpimpa samu ti beno ke ndima Nsemo ve. Amen. Nzambi me fidisa milongi yina ke longa Nsangu ya mbote. Yandi ke fidisa bidimbu mpe mambu ya ngitukulu na kati ya bantu, samu na kusiamisa ti Yawu kele Kieleka; mpe bantu ke manga Yawu, ya kele na kima ve ke bikana kasi mpimpa samu na beno. Beno tambula na kati ya Nsemo na yina Nsemo ke na kulezima, mpangi ya munu. Beno kuzwa Nsemo. Klisto kele Nsemo. Yandi me kwiza samu na kunata Nsemo na beno. Kasi bayina mangaka Nsemo kuzwaka mpimpa. Mpe konso bakala mpe kento, na nkokila yayi, yina ke manga Nsemo, ke tambula na kati ya mpimpa, na kuzabaka ve kisika yandi ke na kukwenda. Yandi ke tuta kieleka dibaku, ke vwanda ya kuzabana na bantu, kasi beto ke kukiyufula wapi mutindu yandi me telema na Ntwala ya Nzambi.

¹⁴⁵ Beno tala yawu! Wapi kima ya kuyituka awa. Yandi vwandaka Nsemo samu na mosi, mpe mpimpa na yankaka. Bantu ya Israel, na yina, na manima Moise sambilaka, bawu vwandaka kuna na ngemba. Beno tala mbote ntangu yayi.

Mpe Moise tandaka diboko ya yandi na zulu ya mubu; mpe MFUMU salaka mubu kuvutuka manima na nzila ya mupepe ya ngolo ya esete mpimpa nyonso yina, mpe salaka mubu ntoto ya kuyuma, mpe maza kukabukaka.

Mpe bana ya Israel lutaka na kati-kati ya mubu na zulu ya ntoto ya kuyuma: . . .

¹⁴⁶ Kana beno tala, na yina bana ya Israël, bayina basikaka na mpimpa mpe ndimaka Nsemo, ntangu bawu kotaka na mpasi, Nsemo lutaka na manima. Mpe bawu lalaka mpimpa ya muvimba. Mpe na yina bawu vwandaka lala, Nzambi vwandaka fidisa mupepe, vwandaka fula na yisi ya mubu, na kuzibulaka nzila ya kukima.

¹⁴⁷ Aleluya na Mwana ya dimeme! Mu kele na kyese mingi ti mu me fuluka na Mpeve-Santu, na nkokila yayi. Na yina beto ke na kulala, na kyese, ke na kupemaka na nsilulu ya Nzambi!

¹⁴⁸ Nzambi silaka bawu, na kusala nzila ya kukimina. Mpe na yina bawu vwandaka pema na zulu ya nsilulu yayi, Nzambi vwandaka kuna, na ntwala ya bawu, na kuzibulaka nzila.

¹⁴⁹ Bakala nyonso mpe kento nyonso, na nkokila yayi, yina ke ndima Yesu Klisto na bisika yina; Mpeve-Santu, na yina beno kele ya kulala, na yina beno ke na kupemaka na nsilulu ya Yandi.

Ya lendaka vwanda ti beno kele kikata; ya lendaka vwanda ti beno kele ya kufwa meso; ya lendaka vwanda ti beno lenda ve kuwa; ya lendaka vwanda ti beno lenda ve kumona; ya lendaka vwanda ti beno ke na kubela; mpasi ya ntima, cancer, to kima mosi, ke na kufwa. Beno ndima Nsemo, na nkokila yayi, mpe beno pema na zulu ya Yawu.

¹⁵⁰ Mpe mupepe, na kukwizaka mutindu mupepe ya ngolo na Kilumbu ya Pentecote, ke kulumuka kuna mpe ke zibula nzila samu na beno, alleluia, ti beno ke luta kaka na nzila ya kiwanda ya kimbevo yina, mbala mosi kuvutuka dyaka na yinsi ya mavimpi ya mbote. Beno ke luta kaka na nzila ya yinsi yina ya bansambulu ya kuswaswana, ya madidi, ya misiku, ya kukangama; na ntima ya kifuluka na Mpeve-Santu, ya kifuluka na kyese, na nsayi, na kusepela.

¹⁵¹ Nzambi ke lakisa ngolo ya Yandi, mpe vwandaka lakisa yawu. Beno lemvokila munu, mu ke na kuzonza na ngolo mingi. Na kulakisaka mpulusu na nzila ya ngolo. Yandi lakisaka menga na manima kuna, na kima mosi. Yandi lakisaka ngolo ya Yandi awa, na nzila ya Menga ya Yandi, na nzila ya mpulusu. Lakisaka ngolo ya Yandi na kukima lufwa, na nzila ya menga. Yandi lakisaka ngolo ya Yandi na kusala nzila ya kukimina, na nzila ya mpulusu ya ngolo.

¹⁵² Mpe, bubu yayi, beno bayina me ndima, amen, beno bayina me ndima Menga ya Yesu Klisto, samu na kusukula beno na disumu, ngolo ya Mpeve-Santu kele awa samu na kutwadisa beno na mbotika ya Mpeve-Santu. Ngolo ya Nzambi kele awa samu na kusoba beno katuka kimbevo na mavimpi. Nzambi, ke na kulandila, na exode ya Dibuundu ya Yandi! Kento ke na kukota na kuyela, kisika Nzambi ke vukisa, na manima ya mwa ntangu fyoti, mbuma ya Yandi. Mbote mingi, me basika na mpimpa, na kukota na Nsemo ya kulutila mbote! Mutindu beto zola yawu! Mutindu mu zola yawu! Yinki ya zola kutuba samu na moyo ya munu, na nkokila yayi! Bankundi, beno . . .

¹⁵³ Mu vwanda solula na bakala mosi bubu yayi, yina vwanda me kutana kaka na munu na ntangu mu vwandaka na ngaanda. Mpe yandi tubaka, “Mu vwanda meka na kutuba na bantu.” Yandi tubaka, “Mu me soba mingi, Billy, kubanda nge vwandaka mwana ya fyoti.” Yandi tubaka, “Nge vwanda lutaka mpe vwanda tubaka na munu, na kisika ya munu ya kisalu, ti mu fwana sungama na Nzambi, Mu fwana sungama na Nzambi.” Mpe yandi tubaka, “Mu na kutala vwanda sekaka nge. Kasi,” yandi tubaka, “Billy, bima me soba ntangu yayi.” Yandi tubaka, “Mu zaba ntangu yayi yina nge vwandaka zonzila.”

Mu banzaka, “Lukumu na Nzambi!”

¹⁵⁴ Yandi tubaka, “Ntangu mu ke meka na kutuba na bantu yankaka na zulu ya yawu,” mpe yandi tubaka, “ba ke soba dyambu mpe ke zonzila na zulu ya zulunale mosi ya kusekisa

to kima yankaka. Oh, ya kele munu ve. Muntu yayi yina ke na kulanda kuna na nsongi, yandi lendaka kufwa. Yandi kele muntu yina ke landa. Ya lendaka vwanda numelo ya yandi kele yina ke landa, na kuzabaka ve numelo ya nani ke na kulanda.” Ya lendaka vwanda ya nge, na nkokila yayi, nkundi. Yayi lendaka vwanda ntangu Nzambi ke bokila nge.

¹⁵⁵ Nzambi, Mpeve-Santu ya nene, yina me telama awa na nkokila yayi, na kati-kati ya lufwa mpe Luzingu; yina me telama awa na nkokila yayi, na kati-kati ya kubela mpe kubeluka. Mu zaba yina mu ke na kuzonzila. Ya kele kieleka. Kaka na ntangu yayi, Mpeve-Santu mosi yina beno ke na kuwa ntangu yayi, muntu nyonso yina kele ya kubutuka dyaka fwana kuwa Mpeve yina na kati ya kivinga. Beno lenda sala kima ve. Kana beno kele na Luzingu, beno zaba ti Yawu kele kuna. Mbote mingi.

¹⁵⁶ Ya kele mutindu aimant, ntangu ya kele... Na ntangu aimant ya nene ke kwiza pene-pene ya kima, ya ke banda na kuningana mpe kukwenda, (samu na yinki?) na yina ya ke na kubelama mingi. Mutindu aimant mosi ya nene yina kulumukaka, awa, na ntangu mosi, na Hammond, na Indiana. Mu vwandaka tala mbote bantu kulokota bakopo, na ntoto. Ba me benda kibendi mosi ya nene; kuna me kulumuka aimant mosi ya nene nene. Mpe ba vwandaka kombola kopo nyonso na kunataka yawu na kati-kati ya dibaya. Mpe na yina ya vwandaka luta, kopo nyonso yina bendamaka na aimant, kisengo, kwendaka kaka na zulu mpe kwendaka na aimant, kuna. Mpe ba me katula yawu, me kotisa yawu na kati ya cupole, mpe me sulumuna yawu dyaka. Ya vwandaka na aluminium mingi ya kopo yina bikanaka. Mu tubaka, “Samu na yinki yawu me kwenda ve?”

Muntu tubaka, “Ba me bendama ve na aimant.”

¹⁵⁷ Mu tubaka, “Nkembo na Nzambi.” Mu tubaka, “Samu na yinki bayayi me kwenda ve, na yisi awa, bitini ya bisengo yayi?”

Muntu tubaka, “Kana nge tala, ya kele ya kukangama na yisi.”

¹⁵⁸ Mpe ya kele mutindu bantu mingi na nkokila yayi, bankundi. Beno me kuma mabele ya dibuundu, kasi ya kubendama ve na mbotika ya Mpeve-Santu. Na yina beno ke bika kima kukanga beno, luswaswanu mosi, kukangama beno.

¹⁵⁹ Kasi mosi ya bilumbu yayi, ya kele na aimant ya nene yina ke katuka na Esete, yina ba me bokila Mwana ya Nzambi, yina ke kombola yinsi yayi. Mpe muntu nyonso yina kufwaka na kati ya Klisto ke vumbuka na Yandi, samu na kukwenda na zulu. Mpe banzutu yayi ya ntama ke sobama mpe ke kuma na mutindu ya Yandi, na nzutu ya Yandi Mosi ya nkembo, kisika beto ke zinga ntangu nyonso mpe ntangu nyonso, ya kimpwanza na kubela, ya kimpwanza na buboba, ya kimpwanza na kima nyonso yankaka; mpe na Nkembo ya Nzambi, samu na kuzinga na Mvwandulu ya

Yandi ya kusakumuna ntangu nyonso. Amen. Beno bika ve ti ya pesa beno boma. Mu ke na kumitala musambidi na ntangu kaka yayi. Kieleka mu ke na kukitala. Mbote mingi.

¹⁶⁰ “Samu mu zaba ti mukudi ya munu kele moyo, mpe na bilumbu ya nsuka Yandi ke telama na zulu ya ntoto yayi; ata ti misopo ya nzutu kubebisa nzutu yayi, dyaka na nzutu ya munu mu ke mona Nzambi; yina mu ke mona na munu mosi; meso ya munu ke mona, mpe yankaka ve.”

¹⁶¹ Beno banza ve ti mu kele kilawu. Mu kele ve. Kana mu kele, beno bika kaka munu swi. Mu kele na kyese mingi mutindu yayi kulutila mutindu mu vwandaka mutindu yankaka. Yinga, tata. Beno bika kaka munu kuvwanda mutindu yayi. Oh, kieleka, “kilawu,” samu na yinza, samu ti, bima yina yinza ke bokilaka bulawu, Nzambi ke bokilaka ya kusakumuna. Beno fwana “zimbisa mabanza ya beno,” na yinza yayi, samu (samu na yinki?) beno kele ve ya yinza yayi.

¹⁶² Ntangu beno ke sabuka ndilulu yina ya nkabwani, beno ke kuma bantu ya ntoto ya Kimfumu ya Nzambi. Oh, la la! Wapi mutindu mbote ya kele? Oh, beno ke kuma kivangu ya malu-malu, (oh, la la) ya kusoba na yayi yina beno kele ntangu yayi. “Beno kele ntangu yayi bana ya Nzambi. Ntangu yayi beto kele ya kuvwanda kintwadi na bisika ya Mazulu.” Ve, “beto ke vwanda,” na Millenium. Beto kele ntangu yayi, kaka ntangu yayi beto kele bana ya Nzambi. “Kaka ntangu yayi beto kele ya kuvwanda kintwadi na bisika ya Mazulu, na Klisto Yesu,” ve kaka na kati ya dibuundu, “na kati ya Klisto Yesu.”

¹⁶³ Mfumu Yesu yina vumbukaka na lufwa kele awa. Yandi kele awa na ngolo ya Yandi. Yandi kele awa na ngolo ya Yandi ya mpulusu. Yandi kele awa samu na exode. Yandi kele awa samu na kukotisa konso mambele ya dibuundu na ngwisani na Yandi. Yandi kele awa samu na kunata konso musumuki, ata wapi mutindu yimbi beno kele, Yandi kele awa samu na kunata ngolo ya mvumbukulu ya Yandi na luzingu ya beno mpe kusala beno kivangu ya malu-malu.

¹⁶⁴ Awa, mwa bamvula fyoti me luta, bansambulu nyonso ya yinza kukutanaka, Mu banza ti ya vwandaka na Londres, na Angleterre, to kisika mosi. Mu ke bambuka moyo kieleka ve. Kasi, ntangu bawu nyonso vwandaka zonzila samu na mabuundu ya mitindu na mitindu, ba-Musulman, mpe ba-Bouddha, mpe nyonso yina. Mwa...muntu yina vwandaka monikisa dibuundu ya Basantu ya Amerika, John Witt, mu banza, vwandaka nkumbu ya yandi. Na yawu ntangu yandi telamaka, na ntangu ya yandi ya kuzonza, kisika bansambulu nyonso vwandaka ya kumonikisa na kuvukana ya nene yayi, yandi tubaka disolo ya Lady Maccabée, mutindu yimbi yandi vwandaka; ba simbaka yandi na Oklahoma, na cigare na yinwa ya yandi, na kunataka ditoma...to na kuzitisaka ve musiku

ya kunata mbangu ditoma, na kulutaka na babala-bala na mbangu nyonso. Yandi kufwaka bantu mingi, mpe vwandaka mvindu mingi, mpe ya mavanga ya yimbi mingi, ti, ntangu ba kwendaka na kutula yandi goudron mpe kutula yandi mapapu, ba vwandaka zola mpe ve kutula maboko ya bawu na zulu ya yandi, na boma ti ba ke kuma na mvindu.

¹⁶⁵ Mpe na yina yandi tubaka disolo yango na mutindu mosi ya ba-emotion, ti konso muntu vwandaka kuwa vwandaka na bansuka ya kiti ya bawu. Yandi tubaka, “Batata, ya bansambulu ya yinza yayi, nsambulu ya beno kele na kima yina lenda sukula maboko ya Lady Maccabée?” Ata muntu tubaka dyambu. Yandi dumukaka na zulu mpe yandi bulaka binkoso ya yandi kintwadi, mpe bulaka maboko ya yandi. Yandi tubaka, “Menga ya Yesu Klisto lenda kaka ve kusukula maboko ya yandi, kasi Yawu ke sukula ntima ya yandi.” Amen. Ya kele kieleka.

¹⁶⁶ Menga ya Yesu Klisto ke baka kento ya kindumba ya kulutila yimbi na Louisville, na Kentucky, mpe kusala yandi mama, santu. Yawu ke katula muntu ya mayuya ya malafu na kisika yina kuna, mpe kusala yandi tata, mpe santu ya Nzambi.

¹⁶⁷ Bankundi ya munu, bantu ya yinsi ya Kimfumu, bampangi ya munu ya Kentucky mpe ya Indiana, mpe bisika nyonso! Beno banza ve, ti nkokila yayi, ya kele na kutala ntangu samu na beno na kutala Mfumu Yesu, ntete ti siansi ya beno ya nsuka kukatuka?

¹⁶⁸ Na yina, beno ke na kumona Dibuundu kukota na exode yayi ya nene, kumona Dikunzi ya Tiya kutambula na ntwala ya beto; kutelama, kusala bimangu mpe bidimbu. Yandi kele awa, na nkokila yayi, na ngolo ya Yandi nyonso ya kuvulusa. Yandi kele awa samu na kubelusa, musumuki nyonso, samu na kuvutula muntu nyonso retrograde. Yandi kele awa samu na kubelula muntu nyonso ya kubela.

¹⁶⁹ Yandi kele Nsangu ya mbote ya muvimba. Mpe beto ke longa Nsangu ya mbote ya muvimba; ke kudyanya nyonso ya Mwana ya dimeme. Kuyoka Yawu na Mpeve-Santu, mpe kuzaba ti Yawu kele mbote na kudyanya, samu ti Mpeve-Santu me samuna beto ti Yawu kele kieleka mbote. “Beno meka mpe beno mona, Mfumu kele mbote. Yawu ke pesa ntomo ya mafuta ya nyosi na ditadi.”

¹⁷⁰ Mfumu ya beto Yesu awa, na luzolo ya Yandi mpe ngolo, na kati ya masakumunu ya Yandi ya nene ya mpulusu! Oh, mutindu Yandi me telama na kati-kati ya dibuundu na disumu, na nkokila yayi! Mutindu Yandi me telama na kati-kati ya beno na lufundusu; ke basisa menga, ke sambila!

¹⁷¹ Awa ntama mingi ve, mu kotaka na kisika mosi awa na Ohio, kisika mu zolaka pesa kaka na kutala lufundusu landila dibanza ya munu. Mu vwanda kudyaka na mwa retaurant mosi Dunkard. Beto vwanda kuzwa lukutakanu mosi ya nene. Mu zolaka vwanda na bakilometele mingi ntama na kizunga,

na mwa motel mosi. Mu vwanda kudyaka na restaurant mosi Dunkard; bantu ya mbote mingi, mpe na Lumingu ba vwandaka kanga mpe vwandaka kwenda na dibuundu. Na yina mu zolaka kwenda na lweka yankaka, na mwa kisika ya mumesanu ya Amerika, samu na kudyaka madya ya munu ya midi.

¹⁷² Na ntangu mu kotaka na kielo, na kuyituka ya munu, kuna vwandaka ya kutelama pulusu mosi ya yinsi na diboko ya yandi ya kuzungidila mwana mosi ya kento, ke na kubulaka na masini ya mbongo. Ntangu yayi, nsaka ya mbongo kele na ngaanda ya musiku na Ohio, mpe kuna muntu ya musiku yandi mosi ke na bukaka musiku. Mpe ya lendaka vwanda, bakala mosi ya bamvula ya munu, mu banza ya kukwela, na dibuta mosi kisika mosi kuna; na maboko ya yandi ya kuzungudila ntwenya mosi ya mama ya kutelama kuna.

¹⁷³ Mu me tala na nsuka na lweka yankaka ya restaurant, mwa bana ya babakala ya kuvwanda kuna na manima, ya kulawuka malafu, mpe ntwenya mosi ya mama vwandaka sala na buzitu mosi ve. Mu me tala, ya kuvwanda kuna, na lweka ya munu ya kibakala awa, na kiti. Yina, mu vwanda kubama na kuvwandila.

¹⁷⁴ Kuna vwandaka ya kuvwanda mama mosi ya kukula, na kutala ya bamvula pene makumi tanu na nana, to ya bamvula makumi sambanu, ya kukula mutindu mama ya munu; ya kuvwanda kuna, mpusu nyonso ya kufuluka na mifutu, ya kulwata mwa bilele ya fyoti. Mpe, oh, ya vwandaka mpasi. Mpe misapi ya yandi ya makulu na ntinta ya violet, bikoba ya yandi na ntinta ya violet, na mutindu mosi ya kutala bantu yina beno me monaka ntete ve. Bansuki ya yandi ya kuzenga nkufi mingi mpe na frange ya kutelama mutindu *yina*. Mpe yandi vwanda kunwa.

¹⁷⁵ Kuna vwandaka ya kuvwanda na yandi, babakala zole kuna, vwandaka pesa na kutala boma, ya kulawuka malafu, mpe mosi ya bawu vwandaka ya kulala na lweka ya dibaya ya mesa. Mpe ntangu bawu lombaka lemvo, mpe me kwenda na kabine . . .

¹⁷⁶ Mu me telama kuna. Mu me banza, “O Nzambi, wapi mutindu Nge lenda bika yawu? Wapi mutindu Nge lenda tala na kima ya mutindu yina? Na ntangu, ata mpe na kati ya ntima ya munu, mpe mu kele yimbi mutindu mu kele, kasi, dyaka mu ke kumiyufula kana mwana ya munu Sarah mpe Rebekah fwana kukula na kati ya nsungi ya mutindu yina samu na kumona bima yina kusalama. Mfumu, samu na yinki Nge lenda ve kukatula yawu na ntwala ya ntoto?” Mu banzaka, “Samu na yinki Nge lenda sala yawu ve, Mfumu?”

¹⁷⁷ Mu vwanda kuna mpe me banda kaka na kudila. Mu me mona vision. Mu me mona, mutindu ya vwandaka, yinza vwandaka baluka na mupepe, mpe ya vwandaka na mukyama na ziunga ya yinza yina. Mpe muntu yina vwandaka zonza na

munu, tubaka, “Yina kele Menga ya Yesu Klisto, na ziunga ya yinza yayi, yina ke kanga Yandi na kubebisa yawu. Kana Nzambi lenda mona disumu, ‘Kilumbu beno ke kudya yawu, kilumbu yina beno ke kufwa.’ Muntu nyonso na yisi ya Menga yina kuna, kele na . . . kele na kimpwanza ya kusoola, na kusala nsodolo ya yandi. Kasi kana mbala mosi beno kufwa, mpe moyo ya beno kukwenda na zulu ya kyadi ya Menga yina, beno kele yimeni ya kufundisa ntete beno kuma kuna. Ya kele ve na kima me bikana samu na beno.”

¹⁷⁸ Kuna mu me mona munu mosi. Mu me mona Mfumu ya munu Yesu ya kutelama kuna, na yimpu ya bansende na zulu ya yintu ya Yandi, mpe maza ya meso vwandaka kulumuka, ya kuvukana na menga, mutindu yawu vwanda kubwa ditonzi na ditonzi na mandefo ya Yandi. Mpe mu monaka masumu ya munu kukwiza na ntwala ya Yandi, mpe ntangu nyonso ya vwandaka kwiza na ntwala ya Yandi mutindu yina, [Kisika ya mpamba na bande—Mu.] . . . tii Yandi vwandaka tekita. Bansende zolaka kota dyaka, na mbunzu ya Yandi. Yandi vwandaka vutuka na kutekitaka. Yandi zolaka tuba, “Tata, lemvokila yandi, yandi zaba ve yina yandi ke na kusala.” Mpe mu zolaka sala dyaka kima, mpe na yina Menga ya Yandi vwandaka mutindu pare-choc na ditoma, na kukeba ditoma, vwandaka keba munu na nganzi ya Nzambi, kukondwa kusala kima mosi.

¹⁷⁹ Mpe mu me belama na Yandi, na malembe nyonso, me fukama na ntwala ya Yandi. Mu me tuba . . . Me tala na yisi kuna, ya kuvwanda na ntwala ya munu, mpe ya vwandaka na buku mosi ya ntama ya disumu, mpe nkumbu ya munu vwandaka ya kusonika na zulu. Mu tubaka, “Mfumu, Nge zola kulemvokila munu?”

¹⁸⁰ “Kieleka,” Yandi tubaka, na meso ya zola; me tula diboko ya Yandi na lweka ya Yandi, me kuzwa mwa Menga, mpe me sonika na zulu ya yawu, “Ya kulemvuka.” Mpe me losa yawu na Mubu ya Kuzimbana. Yandi me tuba, “Ntangu yayi . . .”

Mu tubaka, “Matondo na Nge, Mfumu.”

¹⁸¹ Yandi tubaka, “Ntangu yayi, Mu me lemvokila nge; mpe nge ke na kufundisa kento yayi.” Oh, yina sobisaka foto, samu na munu.

¹⁸² Mu—mu me basika na yawu. Mu me kwenda kuna mpe me vwanda na yandi, mpe bandaka na kusolula. Mpe yandi vwandaka na luzingu mosi ya mpasi na manima ya yandi. Mu tubaka, “Nge vwandaka ata mbala mosi ve Muklisto?”

Yandi tubaka, “Mu kulaka na yinzo ya Baklisto.”

Mpe mu tubaka, “Yinki kusalamaka?”

¹⁸³ Yandi tubilaka munu na yina tadilaka bazimbani ya bakala ya yandi, mpe mutindu ya bana, mpe nyonso yina. Mu tubaka,

“Nyonso, samu na bamvula nyonso yayi, nge me zingaka ntete ve na ngemba tuka nge kutanaka na Nzambi?”

Yandi tubaka, “Tata, ya kele kieleka.”

Mu tubaka, “Nge ke zola kaka ve kundima Yandi na ntangu yayi?”

Yandi tubaka, “Yandi ke ndima munu?”

Mu tubaka, “Yandi ke na kukonkota na ntima ya nge ntangu yayi.”

¹⁸⁴ Mpe kuna na kiti yina, na ntoto, mpe beto fukamaka na ntwala ya nkonga ya bantu yina; bamasini ya mbongo kusutopeke, kufinga ya buzoba kusutopeke, mpe nyonso yankaka. Mpe mu zangulaka maboko ya munu, mpe maboko ya munu . . . mpe maboko yango ya mawa na mifutu, mpe mu twadisaka yandi na Yesu Klisto. Ya kele kieleka. Yawu yina, bankundi. Beno tala ve . . . Yesu . . .

¹⁸⁵ Mu ke tala ve na yina beno salaka, na mutindu masumu ya beno kele ndombe, na mutindu luzingu ya beno kele mvindu; Nzambi kele ya kutelama, na nkokila yayi, ke na kukonkota na kielo ya ntima ya beno, samu na kulemvokila beno, ata nani beno kele.

¹⁸⁶ Beto kulumusa bayintu ya beto na mwa ntangu fyoti. Mpangi ya kento, nge ke zola, kukwiza na orgue kuna?

¹⁸⁷ Tata ya Mazulu, oh, mu ke sambila ti kaka Nge na ntangu yayi . . . na yina Mpeve-Santu ke na kutambula na kati ya kivinga. Ti beto sosa ntete Kimfumu, samu na kuzwa lemvo na Nge, na manima mu ke kwikila ti Nge ke belusa bambevo. Kasi malu-malu yayi, Tata, na kuwaka ti ya kele na luzolo ya nene, ya mundindu mpe kundima, bantu na kuzabaka ti Dibundu ya Nge kele na exode, mpe beto ke na kukwendaka na ntwala ya Lufundusu. Na kuzabaka ve kasi, na suka, muntu lendaka kwiza na lweka ya mbeto, mpe kuna beto me tandamaka, ya kufwa. Na ntangu yayi, mbasi na nkokila, ya lendaka vwanda na kati ya yinzo ya bamvumbi kisika mosi kuna, mpe moyo ya beto kuna na Seko.

¹⁸⁸ O Nzambi, yayi lendaka vwanda ngunga ya nsuka! Yayi lendaka vwanda siansi ya nsuka yina muntu yayi ke kuzwa. Mingi, kukondwa ntembe, kele ya kuvwanda awa, babakala mpe bakento, bayina zolaka, bayina me zinga kaka luzingu ya mbote ya kulunga, kasi me butamaka mbala ya zole ve, zaba ve yina ya zola kutuba kuvwanda ya kifuluka na Mpeve-Santu, luzingu ya muvimba ya kukipesa; na nsoni nyonso, boma, ba me katula na bawu, mpe Mpeve ya Nzambi kubotika bawu na kati ya kyadi ya Yandi.

¹⁸⁹ Tata, ya Luzolo, Nge zola ve, na nkokila yayi, na Nkumbu ya Mwana ya Nge ya luzolo, Yesu, kukwenda na konso ntima mpe kuzonza kaka bubu yayi? Mpe bika ti bawu, na kyese ya ntima

ya bawu, kutelemisa mabanza ya bawu na Nge, na kutelemisaka bantima ya bawu mpe kutuba, “Munu yandi yayi, Yesu. Ndima munu ntangu yayi, kaka mutindu mu kele, mpe yidika munu mpe sala munu kima ya kuswaswana. Sala munu mutindu ya muntu yina Nge zola ti mu vwanda. Luzingu ya munu nyonso, Nge me tuba na munu. Nge me zonza na munu. Nge me meka na kunata munu na kusala mutindu yankaka. Nge me meka na kusala munu kubika yawu. Kasi ntangu yayi kilumbu me luta mingi, Mfumu, na munu, kasi mu me kubama na kukwiza ntangu yayi.” Pesa yawu, Tata. Na yina kyadi ke na kubokila, na ntwala ya Lufundusu; exode ya Dibuundu, kele na kubikaka Égypte; bika ti bawu kwiza, bawu kwenda na nkonga ya nene, ya bayina ba me bokila na kubasika. Beto me lomba yawu na Nkumbu ya Yandi.

¹⁹⁰ Mpe na yina beto me kulumusa bayintu ya beto, mpe meso ya kukangama, mpe Baklisto ke na kusambila. Mu ke kukiyufula kana beno zola kutelemisa kaka diboko ya beno, na kutuba, “Mpangi Branham, nge bambuka moyo na munu. Mu—mu ke kwikila ti konso ndinga yina nge me tuba kele Kieleka na zulu ya Yesu Klisto. Mpe beto nyonso kele na nsatu ya kuvwanda ya kufulukuka na Mpeve, mpe, munu kele, ntete ve. Mu vwandaka mambele ya dibuundu.” To, ya lendaka vwanda beno me vwandaka ntete ve, na mutindu nyonso. Ya lendaka vwanda ti beno vwandaka musumuki, me ndimaka ata mbala mosi ve Klisto. To, beno vwandaka mambele ya dibuundu, mpe beno butamaka na mbala ya zole ve. Beno zola kutelemisa diboko ya beno, kutuba, “Bambuka moyo na munu, Mpangi Branham, na kisambu ya nge. Mu zola kuvwanda ya kusungama.”

¹⁹¹ Nzambi sakumuna nge. Nzambi sakumuna nge, mpe nge, mpe nge, nge, nge; mpe nge, mpangi ya munu ya bakala; mpe nge, mpangi ya kento; mpe nge, mpangi ya bakala; nge, nge, nge, mpangi ya bakala, mpangi ya kento. Mu me mona.

¹⁹² Oh, kuna na diboko ya munu ya kikento, bantu yikwa awa? Beno telemisa diboko ya beno, beno tuba, “Bambuka moyo na munu, Mpangi Branham, mu zola kubutuka.”

¹⁹³ Ntangu yayi, beno bambuka moyo, Mpeve-Santu ke na kuzonzaka na beno. Kana mu kele kisadi ya Nzambi, mu zaba, kieleka mutindu mu kele ya kutelama na estrade yayi, ti Mpeve-Santu ke na kuzonzaka na bantima ya bantu awa. Bankundi, mu lendaka vwanda mutindu yankaka samu na beno, kasi mu kele fanatiki ve. Mu zaba yina mu ke na kuzonzila; kana mu zaba yina kele mpasi ya beno kuna, mpe yina kele kimbevo ya beno, mpe Nzambi kuwa kisambu ya munu samu na beno. Mpe kaka awa na kati ya kivinga yayi kele na bantu ya kuvwanda bayina belukaka, na cancer, mpe bumpofo, mpe makutu ya kufwa, mpe bikata, mpe nyonso yankaka. Beno tala balukutakanu bisika nyonso na yinza. Wapi mutindu samu na beno ntangu yayi? Wapi mutindu samu na yawu ntangu yayi? Kana Yandi ke kuwa

kisambu ya munu samu na yawu, Yandi ke kuwa ve kisambu ya munu samu na kondisyo ya moyo ya beno? Kana Yandi ke talisa munu kisika kele mpasi ya beno, Yandi zola ve kutalisa na munu ntangu yayi mpasi ya beno, mpe?

¹⁹⁴ Bantu yikwa dyaka ke telemisa diboko ya beno, ke tuba, “Mpangi Branham bambuka moyo na munu. Mu zola, na ntangu yayi, nge yufula Nzambi na kutala munu kyadi”? Nzambi sakumuna nge, mpe nge, mpe nge, nge, dyaka. Oh, la la, bisika nyonso na kivinga, bisika nyonso!

¹⁹⁵ Na yina beno kele na bayintu ya beno ya kukulumusa. Mu ke kukiyufula kana beno, bayina me telemisa diboko ya beno, kele dyaka kaka na mwa lemvo ya fyoti, na kutuba, “Mfumumu, mu me kuzwa lemvo mingi na kutelemisa diboko ya munu, pesa munu lemvo mingi samu na kutelama na yina yandi ke sambila. Kana Yandi kwiza samu na munu, na ntwala ya nsemo ya kilumbu, Mfumumu, yayi kele kidimbu ya munu samu na Nge, ti mu zola kuvwanda ya kusungama. Mu zola kukutana na Nge kilumbu. Na nsuka ya munu mpe ntangu mu ke kangama na kuse ya munu na lufwa. Dokotolo ke bika lweka ya mbeto ya munu; kima ve lendaka salama. Kuna, Nzambi, tala moyo ya munu mawa. Na ntangu dibungi ya madidi ya lufwa ke pepa na kati ya kivinga, bika ti masuwa ya ntama ya Sion kukwiza, kunata munu. Mu ke telama, Mfumumu. Ya ke na kulomba lemvo mingi, kasi Kima ke na kunata munu. Mu ke telama.” Nzambi sakumuna nge, mpangi ya bakala.

¹⁹⁶ Muntu yankaka ke telama, ke tuba, “Mu ke telama, Mfumumu.” Nzambi sakumuna nge, mpangi ya bakala. Nzambi sakumuna nge, mpangi ya bakala, mpangi ya kento. Beno vwanda kaka ya kutelama. Muntu nyonso yina zola ti ba bambuka moyo na yandi na kisambu yayi, samu na mpulusu ya moyo ya beno, beno zola kutelama. Nzambi sakumuna nge. Nzambi sakumuna nge, ntwenya ya bakala. Nzambi sakumuna nge, tata. Nzambi sakumuna nge, mpangi ya bakala. Nzambi sakumuna nge, mpangi ya munu ya kento. Nzambi sakumuna nge, mpangi ya kento; nge, mpangi ya bakala.

¹⁹⁷ Muntu yankaka ke telama ntangu yayi mpe ke tuba, “Munu yandi yayi. Mpangi Branham, mu ke na kutelama ve na ntwala ya nge. Mu ke na kutelema na ntwala ya Nzambi. Kima me tuba na munu na kutelema, mpe mu ke na kutelama.” Beno ke sala yawu? Beno telama kaka. Beno ndima Nzambi mutindu yayi. Nzambi sakumuna nge, mama.

¹⁹⁸ Ya kele na dyaka. Nzambi sakumuna nge, mama. Ya kele kieleka. Mama yayi ya mawa ya kunangula mwa bebe ya yandi ya fyoti, ke na kumeka na kutelama, na maza ya meso na meso ya yandi. Beno zola ve kukwiza? Beno telama dyaka. Nzambi sakumuna nge, mama, mama ya kiboba yina me telama kuna, mpe kiboba ya kieleka, na kuzabaka ti yandi fwana kukutana

na Nzambi, mosi ya bilumbu yayi. Nzambi sakumuna nge. Nani ke telama na manima ntangu yayi, ke tuba, “Mu ke telama?”

Beno vwanda kaka ya kutelama samu na kisambu.

¹⁹⁹ Muntu yankaka? Mu ke na kuwa mutindu ti ya kele na muntu yankaka yina zola kutelama. Ya lendaka vwanda ti beno zola kaka kubelama mingi. Beno vutula dyaka yawu ve. Beno telama kaka. Beno zola kusala yawu? Beno bayina ke zola kuvwanda ya kubelama mingi na Nzambi. Nzambi sakumuna beno. Ya kele kieleka. Muntu ke zola . . . Nzambi sakumuna nge, mama. Yinga, tata.

²⁰⁰ Ya kele dyaka na bantu tatu, mu ke na kutalaka kaka na lweka yango, ba fwana telama, samu ti kuna kele ya kutelama Wanzio ya Nzambi. Nzambi sakumuna nge, mama. Ya kele kieleka. Ntangu yayi, mbote mingi, mpangi ya bakala, wapi mutindu samu na yawu? Mbote mingi. Mpe, Wanzio ya Mfumu kele ya kutelama, mu zaba. Mu ke mona Yandi, mpe mu zaba ti muntu fwana telama kaka na ntangu yayi. Mu ke vingila kaka muniti dyaka. Bika ti Nzambi . . . Beno zaba ti Yandi ke na kubyetaka ntima ya beno. Yandi me telema kuna, nkundi ya munu. Ya kele Yandi yina ke na kutubaka na beno na kutelama. Beno zola ve kusala yawu? Beno telama kaka mpe beno ndima Yandi, kaka ntangu yayi. Mbote mingi.

²⁰¹ Beno me ndima ntangu yayi? Kana Nzambi lendaka bokila beno na nkokila yayi, na lukutakanu yayi; dilongi yayi, kubokila yayi, ke kutana na beno kuna ntangu beno ke kufwa. Yinki beno me sala samu na yawu? Kana beno ke ndima ve, kieleka, beno telama ntangu yayi, samu ti Yandi ke mona beno zola kundima, kutambula na kati ya Nsemo.

²⁰² Ntangu yayi, Tata ya beto ya mbote ya Mazulu, bana yayi ya Nge ya luzolo, me petisa bantima ya bawu, Ndinga me kubwa na kati ya bantima ya bawu na nkokila yayi. “Lukwikilu ke kwizaka na nzila ya kuwa, mpe kuwa ya Ndinga.” Mpe Nge lendaka kuwa. Mpe Nge me petisa bantima ya bawu, mingi me telema, babakala mpe bakento, bana ya babakala mpe bana ya bakento, ke tuba Nge mutindu Mvulusi ya bawu mosi ya luzolo mpe Ntwadisi.

²⁰³ Mpe ti Wanzio ya Nzambi, Yandi yina kele awa ntangu yayi na nkokila yayi, ti Yandi kutwadisa bawu na nzila ya luzingu. Ti bawu kutwadisama na Calvaire kaka ntangu yayi, na kati ya bantima ya bawu, mpe kundima Yesu mutindu Mvulusi ya bawu. Mpe ti Mpeve-Santu, na nzila ya Menga ya Klisto, kulumuka na zulu ya myoyo ya bawu, mpe kukatula kukondwa kukipe nyonso, mpe kufulusa bawu na mbotika ya Mpeve-Santu. Ti yayi kuvwanda nkokila ya kulutila nene ya luzingu ya bawu. Beto zaba ti ya kele, samu ti na nkokila yayi ba me ndima Nge. Pesa yawu, Mfumu, kaka ntangu yayi. Mpe ti bawu kwenda na yinzo na kukatukaka awa, na nkokila yayi, na nsayi mpe kyese, na

kukembilaka Nzambi, na ntima ya bawu nyonso. Mu ke lomba lusakumunu yayi na nzila ya Nkumbu ya Klisto Yesu.

Ntangu yayi ti Mfumu kusakumuna beno na yina beno ke vwanda.

²⁰⁴ Bika mu yufula beno ntangu yayi. Mosi na mosi ya beno yina telemaka, mpe beno zaba ti kima mosi me salama na beno na ntangu beno vwandaka ya kutelama, beno telemisa diboko ya beno. Beno telemisa kaka diboko ya beno, beno zaba ti kima me salama. Nzambi sakumuna nge. Nzambi sakumuna nge. Ya kele kieleka. Ya fwana, bankundi. Ya fwana. Mu me telema, mu me mona kaka awa ntangu yayi, Wanzio mosi yina mu me zonzila, kutambula awa na kivinga; Wanzio mosi ya Mfumu, Dikunzi ya Tiya. Mu vwandaka me longa bamuniti tanu to kumi ya nsuka, na yisi ya lutwadusu ya kimpeve yina. Mu ke na kuwa Yandi, mu me mona kaka Yandi kutambula na kivinga yayi. Ntangu yayi, beno lendaka banza ti mu ke na kutuba na beno disolo, kasi ya kele Kieleka.

²⁰⁵ Ntangu yayi, mu banza ve ti mu ke bokila mulonga ya bisambu. Mu banza ti mu ke telama kaka awa mpe mu ke lomba kaka Nzambi na kusiamisa ti mu me tuba na beno Kieleka, ya kele kieleka, na bidimbu, na mambu ya ngitukulu.

²⁰⁶ Bantu yikwa awa zola kubeluka, bambevo? Beno telemisa maboko ya beno, ata kisika nyonso beno kele. Beno telemisa kaka diboko ya beno, beno tuba, “Mu me ndima yawu.” Mbote mingi.

²⁰⁷ Mu zola ti beno tala, beno zinga, mpe beno kwikila. Muntu na kati ya kivinga yayi, na lweka *awa*, muntu na lweka awa, beno tala kaka, mpe beno tuba, “Mfumu Yesu . . .”

²⁰⁸ Mutindu yayi. Mu banza, kikuma mu salaka ntete mbokolo na autel yina, beto fwana kuzwa lemvo na Yandi. Yayi kele kima ya malu-malu samu na munu. Mu fwana kuzwa lemvo na Yandi, ntete. Na yina kana mu kuzwa lemvo, mpe ti mu sala lemvo . . . Mpe beno, myoyo kumi na zole mosi, to zole, kukwiza kaka na Yandi kuna. Kieleka, kieleka . . .

²⁰⁹ Ntangu yayi samu na beno, mosi na mosi ya beno bantu yina me kwiza na Klisto, kuna, beno kuzwa dibuundu ya mbote ya kifuluka na Mpeve-Santu mpe beno kwenda na yawu. Mpe kuna beno sosa mbotika ya Yandi tii beno ke kuzwa Yawu; beno kwenda kaka, kaka nkokila nyonso, kilumbu nyonso, beno landila kaka na kusambila. Mpe ntangu beno ke tala . . .

²¹⁰ Ntangu yayi, beno bantu yina kele ya kubela. Kana mu me tuba na beno Kieleka, Nzambi ke pesa kimbangi ti ya kele Kieleka. Ya kele kieleka. Kaka lenda sala yawu. Mpe Nzambi ke sala yawu kuzabana, kana beno ke sambila kaka mpe kukwikila na ntima ya beno ya muvimba. Beno tala kaka, mpe beno tuba yayi . . .

211 Ntangu Wanzio ya Mfumu kukutanaka na munu kuna na Green's Mill, na Indiana, bamvula nana me luta; na manima ya kuvwandaka tuka mwana, na kulandaka munu, ke lakisa bavisision. Ntangu mu kwendaka na Yandi, Yandi tubaka, "Kana nge ke vwanda ya kusungama, nge nata bantu na kukwikila na nge, kima ve ke telama na ntuala ya kisambu ya nge."

212 Ntangu yayi, Yandi lenda sala kima mutindu mosi samu na beno ntangu yayi ti Yandi lenda mutindu na ntangu yina. Yandi vumbukaka na lufwa. Mpe Yandi . . . kuna nkonga ya bantu na ntuala ya Yandi. Yandi zaba yina kele na zulu ya mosi na mosi ya beno, yina beno salaka, yina kele mpasi ya beno, nyonso na zulu ya yawu. Beno ke kwikila yawu? [Dibuundu me tuba, "Amen." — Mu.] Na yina beno kwikila yawu na ntima ya beno nyonso.

213 Mu ke tala ntwenya mosi ya bakala ya kuvwanda awa, yina ke na kukwikila, ke na kumeka, kele na lukwikilu. Nge ke kwikila ti Nzambi ke bika munu kuzaba yina ke tambula mbote ve na nge? Nge ke kwikila? Kana Yandi sala, nge ke ndima kubeluka ya nge? Nge kele na mpasi ya ntima. Ya kele kieleka ve? Yinki ke salama kana mu tuba na nge ntangu yayi ti nge belukaka na yawu? Nge ke kwikila yawu? Telema kaka mwa ntangu fyoti. Nge ke na ntima ya boma, mpe ntima ke niungutaka. Ya ke kwamisa nge ya me kuma mwa bilumbu. Na ntangu kaka, ntangu beno ke lala, mpe, ya ke kanga beno, mpe beno ke kuzwa kubula ya ntima ya mbangu mingi mpe nyonso yina, ke sala. Ya kele kieleka? Samu, ya ke pesaka ntomo ya yimbi na kifundu ya nge, na kumataka na nzila ya musisa yina. Ya kele kieleka ve? Nge ke kukikwamisa dyaka ve na yawu. Kangama kaka na yina kele na nge kaka ntangu yayi; nge lenda kwenda na yinzo mpe kuvwanda mbote.

214 Mu ke na kutangaka ve mabanza ya nge. Mu kele nzenza ya kieleka samu na nge. Nge kele kaka muntu ya kuvwanda kuna. Ya kele kieleka? Mu me monaka nge ntete ve na luzingu ya munu, mpe me zabaka ntete ve kima mosi na zulu ya nge. Ya kele kieleka? Kwikila ti Mfumu kele awa!

215 Ya kieleka, ntwenya ya bakala, mu zola kuyufula nge kima, mpe nge mona kana yayi kele kieleka to ve. Kaka na mwa ntangu fyoti me luta, na mbala mosi, kima mosi ya ngitukulu me kwiza na zulu ya nge na ntangu mu me banda na kuzonzila "ntunga me katuka na kitutu ke tsokotaka." Ya vwandaka kieleka ve? Ya vwandaka ve na kuwa mosi ya ngitukulu nge vwandaka me kuzwa, na kuvwandaka kuna? Ya kele kieleka ve? Mpe nge talaka munu ve na ntangu mosi yina, mpe meso ya munu kukangaka nge na ntangu yango mosi? Ya kele ntangu nge belukaka, na mpasi ya ntima, kaka kuna. Amen. Ya kele kieleka. Yandi kele awa.

216 Mu ke na kutangaka mabanza ya nge ve, bankundi. Mu ke na kutuba kaka Kieleka, mpe Nzambi ke na kusiamisa ti ya kele Kieleka.

217 Yinki nge ke banza samu na yawu, nge ya kuvwanda kuna pene-pene ya yandi? Nge ke kwikila? Nge ke kwikila ti mu kele profete ya Nzambi? Nge ke kwikila kana Nzambi . . . Nge yina me vwanda na ntwala, awa na kiti ya mantwala, ya kele samu na yina mu ke na kuzonzaka mingi na beno, Mpeve na manima kuna, na ziunga ya munu. Kasi nge ke kwikila, kana mu lendaka kota na kiwisa na mpeve ya nge, Nzambi ke monisa yina ke tambula ve mbote? Nge ke ndima kubeluka ya nge? Nge kele na diabete. Ya kele kieleka? Telemisa diboko ya nge kana ya kele kieleka. Telama. Nge ke ndima kubeluka ya nge ntangu yayi? Ti Mfumu Yesu Klisto kukumisa ba-sens ya nge nyonso mbote. Nzambi sakumuna nge.

218 Beno vwanda na lukwikilu. Ti muntu *awa* kukwikila. Beno vwanda na lukwikilu, na ntima ya beno nyonso.

219 Mu ke mona ntwenya ya bakala ya kuvwanda kuna ya kulwata complet ya bleu. Kuna Yandi kele ya kutelama kaka na zulu ya yandi. Nge kele na kimbevo ya mpusu, mutindu yina ve, ntwenya ya bakala? Ya kele kieleka ve? Telema. Oh, mu ke mona, nge kele na banzenza yayi. Ya kele kieleka? Mbote, nge zola kuvutuka na yinzo mbote? Telemisa diboko ya nge mpe tuba, “Mfumu Yesu, mu ke kwikila ntangu yayi ti Wanzio ya Mfumu ke na kutwadisa. Mpe mu ke kwikila ti mu me beluka.”

220 Wanzio Yinki nge ke banza samu na yawu, muntu yina kele na lweka ya yandi kuna, nge ke kwikila, mpe? Telama mwa ntangu fyoti, samu mu tala nge. Nge ke kwikila ti mu kele kisadi ya Nzambi; na ntima ya nge nyonso? Nge zola basika na mpasi ya ntima yina? Ya kele yina vwandaka na nge, mutindu yina ve? Ya kele yina “*vwandaka*” na nge, mu me tuba. Nge kele ve na yawu ntangu yayi. Nge lenda kwenda na yinzo, mpe.

221 Muntu na lweka ya yandi, yinki nge ke banza samu na yawu, tata? Nge ke kwikila na ntima ya nge nyonso? Nge ke kwikila ti mu kele profete ya Nzambi? Telema. Nge ke kwikila na ntima ya nge nyonso ntangu yayi? Nge ke na boma. Ya kele kieleka ve? Beno me mona? Ya kele kieleka? Telemisa diboko ya nge. Nge lenda vutuka na yinzo na mavimpi ya mbote ntangu yayi. Yesu Klisto me belusa nge.

222 Wapi mutindu samu na muntu yina ke landa, yina me telama, kuna na mulonga, nge ke kwikila na ntima ya nge nyonso? Telama. Nge ke kwikila ti mu kele profete ya Nzambi, kele kisadi ya Yandi? Nge ke kwikila ti Yandi ke tuba na munu yina ke tambula ve mbote na nge, ti nge ke ndima kubeluka ya nge? Ya kele na laka ya nge. Ya kele kieleka? Vutuka na yinzo mpe vwanda mbote, na Nkumbu ya Yesu Klisto.

223 Muntu nyonso yankaka na kati ya yinzo yayi, yina zola kubeluka, lenda telama mpe kubeluka. Kana beno me kwikila munu, mutindu kisadi ya Nzambi, beno telama. Nzambi sakumuna beno. Mpasi ya bakento, cancer, kuna ya ke na

kukwenda. Nzambi kuzwa lusakumunu! Mosi na mosi ya beno, beno telemisa maboko ya beno na Nzambi.

²²⁴ Tata ya beto ya Mazulu, mu ke telemina ntangu yayi konso kimbevo ya yinzo yayi, ke basisa mpeve nyonso ya yimbi, mpe ti Mpeve-Santu kuyala ntangu yayi mpe kukumisa muntu nyonso mbote.

²²⁵ Beno tentika maboko ya beno na zulu ya mosi na yankaka, mpe beno tuba, “Nkembo na Mfumu,” bisika nyonso. Mpe beno yangalala mpe beno vwanda na kyese, samu ti Yesu Klisto kele awa, Mwana-dimeme ya Nzambi, samu na kupesa beno mavimpi ya mbote, mosi na mosi.



MPULUSU NA NZILA YA NGOLO KNG54-0329
(Redemption By Power)

Nsangu yayi ya Mpangi William Marrion Branham, kulongamaka na Kingelesi, na Kilumbu ya ntete na nkokila, na kilumbu ya 29 ya Ngonda ya tatu, na mvula 1954, na dibuundu the Church Of The Open Door na Louisville, Kentucky, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org